

嘉靖寧夏新志

寧夏新志卷之四

中華書局上海編輯所藏書

沿革考證 志寧夏而詳於沿革及赫連拓跋之考證者何歟 按古以繼今也 按古以繼今者何歟 蓋是地開拓之始未用力之難易暨唐宋之俟得倏失本於任人之有賢有否運籌之或優或劣盡可為今之準也 故竹山不避其繁而備載之 茲又增其所未備者

夏禹

浮于積石至于龍門西河 禹貢蔡沈傳按邢恕奏乞下熙河路打造船五百隻

於黃河順流放下至會州西小河內藏放熙河路漕使李復奏竊知邢恕欲用此船載兵順流而下去取興州契勘會州之西小河水其闊不及一丈深止於一二尺豈能藏船黃河過會州入常精

山石峽險窄自上垂流直下高數十丈船豈可過
至西安州之東大河分為六七道散流渭之南山
逆流數十里方再合逆溜水淺瀕磧不勝
舟載此聲若出必為夏國侮矣事遂寢

漢

北地郡十九縣

內靈武富平
靈州隸之

朔方郡十縣

內朔方臨
河隸之文

獻興
地考

甲寅世宗孝武皇帝元朔二年春正月立朔方郡募

民徙之

主父偃言河南地肥饒外阻河城之以逐
匈奴省轉輸上用其計立朔方郡募民徙

者十萬口築城繕塞因
河為固即什費故城也

辛酉元狩三年秋山東大水徙其貧民於關西朔方

山東被水民多饑乏不能賑救乃徙於關西朔方新秦中七十餘萬口皆仰給縣官數歲貸與產業

新秦今河東舊麟州也

辛未元封元年冬十月帝出長城登單于臺至朔方

勒兵而還上以古者先振兵釋旅然後封禪乃自靈陽歷五原出長城北登單于臺至朔

方臨北河勒兵十八萬騎旌旗徑千餘里遣使告諭單于乃還

己丑世祖光武皇帝建武五年冬十二月盧芳入塞

掠據朔方等五郡初安定盧芳詐稱武帝曾孫劉文伯遣使與匈奴結和親單于

迎芳入立為漢帝朔方人田綱等各起兵至單于
庭迎芳入塞都九原縣掠有朔方等五郡並置守
令與胡通兵
侵苦北邊

辛卯七年冬盧芳朔方郡降芳以事誅其五原太守李興其朔方太守田颯

舉郡降帝令領職如故

丙寅孝順皇帝末建元年秋七月增置朔方緣邊兵

屯

己巳四年秋九月詔復北地郡虞詡言北地以西山川阻阨沃野千里土

宜畜牧水可漑漕郡縣兵荒二十餘年矣棄沃壤之饒捐自然之財不可謂利離河山之阻守無險

之處難以爲國上從之使謁者督徙者
各歸本縣繕城郭置候驛又濬渠屯田

南北朝

夏州後魏置弘化郡西魏置文獻輿地考

甲辰 梁武帝普通五年魏魏胡方胡及夏州刺史源

子雍討平之魏朔方胡反圍夏州城中食盡刺史源子雍留其子延伯守統萬乃帥

弱詣東夏州運糧爲胡帥所禽延伯以義感衆奮厲固守子雍雖被擒胡人常以民禮事之子雍爲

陳禍福賊衆遂降時東夏州闔境皆反子雍與北海王顥約兵轉聞而前凡數十戰遂平東夏州徵

粟挽芻以饋統萬二夏獲全

癸丑 梁中大通五年魏 孝武帝末熙二年 秋八月魏以宇文泰為夏州

刺史 賀拔岳遣詣洛陽密陳高歡反狀魏主書以岳為都督二十州軍士岳遂引兵屯平涼夏

州刺史彌俄突附岳靈州刺史曹泥附歡岳以夏州被邊要重表用宇文泰為刺史

乙卯 梁大同元年魏文帝寶炬大統元年 春正月魏將

軍李虎克靈州 宇文泰遣李虎等擊曹泥虎等招諭費也頭之衆與之共攻靈州凡

四句曹泥請降

丙辰 梁大同二年魏大統二年 春正月東魏大丞相歡襲

魏夏州取之魏靈州亦叛附于歡 高歡自將萬騎襲魏夏州不火

食四日而至縛預為梯夜入其城禽刺史斛拔俄
彌突因而用之留張瓊將兵鎮守遷其部落以歸
魏靈州刺史曹泥復叛降東魏魏人圍之水灌其
城不沒者四尺歡登阿至羅騎徑度靈州遠出魏
師之後魏師退歡迎泥
拔其遺戶五千以歸

隋

靈武郡六縣

迴樂弘靜懷遠靈武鳴沙豐安文獻興地考

壬戌隋高祖文皇帝仁壽二年冬十二月除治書御

史柳或名配懷遠鎮

或嘗按楊素事過於臨菑素街之蜀王事敗素奏或受王

遺婢乃除名

配成懷遠鎮

唐

夏州三縣

朔方寧朔德靜

靈州四縣

迴樂懷遠靈武保靜文獻輿地考

天下諸州屯九百九十有二靈州之屯三十有七夏

州之屯二每五十頃為一屯

唐六典

丁亥太宗文武皇帝貞觀二年夏四月遣右衛大將

軍柴紹等討梁師都其下殺之以降以其地為夏

州

丙午二十年秋八月帝如靈州遣李世勣擊薛延陀

隆之敕勒諸部遣使請吏遂勒石

主許嫁薛延陀

既而幸靈州未隙與之絕昏薛延陀多彌可汗寇

夏州尋亦國破被殺餘衆立真珠凡子吐摩支遣

使奉表請居贊督軍山之北上自詣靈州招撫李

世勣至贊督軍山吐摩支降回紇等十一姓各遣

使歸命乞置官司上大喜遣使納之為詩

曰雪耻副百王除凶報千古勒石於靈州

丙申中宗皇帝嗣聖十三年同武氏萬歲秋九月突

厥寇涼州執都督許欽明以寇靈州

默啜寇涼州執欽明自隨

以寇靈州欽明至城下大呼求美醬梁未及墨意

欲城中選良將引精兵夜襲虜營而城中無論其

者意

丙午神龍二年冬十二月突厥默啜寇鳴沙

默啜寇鳴沙靈

武總管沙吒忠義與戰敗死者六千餘人

戊申景龍二年春三月朔方總管張仁愿築三受降

城突厥默啜悉衆西擊突騎張仁愿請乘虛奪取漠南地於河北築三受降城六旬而城首尾相

應皆據津要於山北置烽堠千八百所自是突厥不敢度山畋牧鎮兵數萬人城不置雍門守具且

曰兵貴進取寇至當併力出戰回首望城者斬之安用守備生其退恐之心也中城南直朔方西城

南直靈武東城南直榆林其北皆大磧也

壬戌玄宗皇帝開元十年夏四月以張說兼知朔方

節度使

置朔方節度使領單于都護府夏鹽等州軍三受降城以宰相張說兼領之

丙戌天寶五載春正月以王忠嗣為河西隴右朔方

河東節度使

忠嗣每互市高估馬價諸胡聞之爭以馬求市由是胡馬少唐兵益壯忠

嗣仗河西隴右朔方河東四節控制萬里天下勁兵重鎮在其掌握累獲大捷

丙申十五載秋七月太子即位於靈武

帝避安祿山之禍出奔蜀

留太子討賊太子至平涼朔方留後杜鴻漸等迎於平涼北境牋五上是日即位靈武尊帝為上皇天帝大赦改元楊炎受命宮頌并序臣聞享天降命惟德也戲難奉時惟聖也必有非常之運是與撥亂之功君以蒼生為憂不以濡足為患以寧濟為業不以脩身為道此陶唐所以捨而不畏舜禹

所以受而不疑靈武宮皇帝躍龍之所曰者奸臣
竊命四海蕩波我聖皇天帝探命歷之數啓龍圖
作受命之書付于我皇帝皇帝方遊崆峒以求至
道於是群公卿士負玉旒金璽望氣芒碭之野三
進於閭闔之中曰臣聞在昔蚩尤連禍大盜中國
神農氏兵莫能勝天降玄女勅軒轅氏大定其災
厥後堯有九州之害而命禹禹以四海之功而受
舜陛下主鬯大位十有九年精爽者皆美德馨乾
坤也必聞幽贊玄德上達景福有歸六聖覩命歷
之期兆人有臨難之情陛下畏災運而不寧棄黎
元而不顧以至仁為薄以大寶為輕臣等若不克
所請與億兆之衆披髮拊膺號於天而訴於帝矣
皇帝唯然改容曰豈人心歟丁卯廣平王做大尉
光弼司徒子儀尚書左僕射免兵部尚書輔國中
北軍將士西上耆老萬五千人排闥以訴帝曰今
豺狼亢居宮闕陛下兆庶為餌宗廟為墟若臣等

誠懇未通是高祖不歆於太廟且陛下涉渭則洪
流迴鑿則慶雲見布澤而川池廣勤道而嘉禾
生靈祗鬃髻玄貺幽感臣聞符命待聖而作天運
否終而會歲難吟蟹會也睿武英明聖也臣等敢
昧死上聞帝乃灑齋宮啓金匱鳴咽拜受詔有司
大赦天下改元曰至德元年尊聖父爲文武大皇
帝是日煙雲變作土庶踴躍黃龍見於東野紫氣
滿於天門翌日也數百里衣裳會兼旬也數千里
朝貢會踰月也天下兵車會決時也四方戎狄會
以一族成百萬之師率胡夷平杜稷之難禮郊祀
冀聖皇與人合誠心以氣消天厲動罔不吉歆無
不報是以白鹿擾於王庭靈芝產於延英化動而
功成淵默而頌聲言禪代者陋蒼梧易姓之名語
嗣守者羞唐堯積善之辱述戡定者歎四紀而復
夏美中興者蚩三六而滅新於戲神祇之所歸往
品物之所法象鼓飛龍於尺水仗大義而東向矢

謨發號實在茲都願篆石宮庭以垂萬古俾過山
澤和風雨之奧窮造化識天地之爐臣炎稽首敢
獻頌曰赫赫河圖啓天之祐雲從億萬皇在九五
為昔陶唐克傳舜禹濩也武也夫何足數彼妖者
勃惟暴惟貪天實即命人將不堪皇曰內禪于再
于三盡武之善去湯之慙兵卒百萬洵洵雷震橫
會九州為行為陣恃力者暗從命者順孝以奉天
神而撫運至德唐堯崇功大禹皤皤北叟垂白而
覩沛邑空歌周原已古 八月以郭子儀為靈武長
徘徊頌聲永介茲土

史子儀將兵五萬自河北至靈武靈
武軍威始盛人有與復之望矣

乙巳代宗皇帝永泰元年秋閏九月以路嗣恭為朔

方節度使請以嗣恭鎮之嗣恭披荆棘立軍府威

行令大

癸亥德宗皇帝建中四年冬十一月靈武鹽夏渭北

諸將合兵入援遇賊潰歸上奔奉天靈武留後杜希全鹽夏刺史戴休顏

時春渭北節度孚建徽合兵萬人入援將至奉天用盧杞言從漢谷出為賊所邀死傷甚衆四軍皆潰

丙寅貞元二年冬十二月吐蕃陷夏銀麟州

丁卯三年秋七月以韓潭為夏綏銀節度使吐蕃之戍西夏

者饋運不繼人多病疫思歸尚結贊遣三千騎逆之悉焚其廬舍毀其城驅其民而去於是割振武

之綬銀二州以渾為節度使帥神策之士五千朔方河東之士三千鎮夏州

己亥憲宗皇帝元和十四年冬十月吐蕃寇鹽州靈

武將擊破之

吐蕃十五萬圍鹽州刺史李文悅竭力拒守凡二十七日吐蕃不能克

靈武牙將史奉敬言於朔方節度使杜叔良請兵解圍叔良以二千五百人與之奉敬行旬餘無聲

問朔方人以為俱沒矣無何奉敬自地首出吐蕃背吐蕃大驚潰去奉敬奮擊大破之於是中書門

下上表稱賀曰臣某等言臣等今日面奉德音靈武大破吐蕃擒生斬將者伏以膚謀武經陰騭上

畧兵符所授攻戰多方蠢茲犬羊尚勞權燧群師稟命中權戒嚴椅角相因初設險於三覆竒正合

發俄獻功於七擒數首渠之首級積戎械於亭候勝氣餘勇鼓行無前即叙可期有征斯在臣等謬

居樞被莫効治埃每承以律之貞空荷止戈之運無任慶快踴躍之至謹奉表陳賀以聞

辛未宣宗皇帝大中五年春二月以李福為夏綏節

度使上頗知党項之反由邊帥利其羊馬數欺奪誅殺之自是繼選儒臣以代邊帥之貪暴者

党項
遂安

己巳晉李存勗岐李茂貞淮南楊溼稱冬十一月岐

唐天佑六年梁主晃開平三年

遣劉知俊攻梁靈州梁遣兵救之大敗而還岐王茂貞

受劉知俊降欲取靈州以處之使自將兵攻之州方告急于梁梁遣康懷貞王彥章等將兵救之為

所知俊
所敗

己丑後唐明宗李嗣源天成四年冬十月唐以康福為朔

方節度使前磁州刺史康福善胡語每以對上安

被害以福為朔方河西節度使遣萬人衛送之行

至方渠羗胡出兵邀福福擊走之至青剛峽遇吐

蕃野利大蟲一族數千帳福大破之殺獲殆盡

由是威聲大振遂進至靈州由是朔方始受代

丙申唐主從珂清泰三年十一月冬十二月晉以

張希崇為朔方節度使初朔方節度使張希崇為

田以省漕運使為靜難節

度使至是乃使鎮朔方

己亥晉天福四年春正月晉以馮暉為朔方節度使張希崇卒

羌胡寇鈔無復畏憚党項酋長拓跋彥超最為強大暉至超入賀暉厚遇之因於城中治第豐其服玩留之不遣封內遂安

丙午

晉出帝重貴

秋八月馮暉擊破党項入靈州

暉

靈武得羌胡心市馬暮年至五千匹朝廷忌之徙鎮邠州會有羌胡之擾使將關西兵擊之過旱海糗糧已盡拓跋彥超衆數萬扼要路據水泉以待之軍中大懼暉以賂求和於彥超彥超許之自旦至日中使者往返兵未解藥元福曰虜知我饑渴陽許和以困我耳若至暮則吾輩成擒矣今虜雖衆精兵不多依西山而陳者是也其餘步卒不足為患請公嚴陳以待我以精騎先犯西山兵少勝舉黃旗大軍合勢擊之乃帥騎先進用短兵力戰彥超小却元福舉黃旗暉引兵赴之彥超大敗明

日暉入

靈州

宋

癸亥高宗皇帝紹興十三年

金熙宗宣統三年

春三月夏地

震

逾月止地裂泉湧出黑沙是歲大饑

甲子理宗皇帝景定五年

蒙古世祖皇帝至元年

春正月蒙古

遣唆脫顏郭守敬行視寧夏河渠

至元元年命秦城縣人董文用

為西夏中興省郎中文用開漢延慶來秦家筆渠
懇水田以授夏人率以渾都海作亂渠復湮塞至
是因張文謙薦邢臺縣人郭守敬為西夏河渠提
舉守敬因舊謀新更立埽堰渠復通夏人利之速

立生祠以祀守敬 秋七月蒙古以中書左丞張文謙行寧

夏中興等路尚書省事

中興先俗素鄙野事無統紀文謙求蜀士為人僕隸

者得五六人授忍例理而出之俾通明者為吏教以索贖旬月之間樞機品式粗若可觀羌人始遣子弟讀書土俗為之一變又疏興州古唐來漢延二渠及夏靈應理鳴沙四州工渠十支渠大小共六十八溉田十萬餘頃而行省即中董文用銀符副河渠使郭守敬寔佐其事

丙寅度宗皇帝咸淳二年

蒙古至元三年

夏五月蒙古禁寧

夏良田為僧所據者聽蒙古人分墾

元

庚寅世祖文武皇帝至元二十七年春三月復立營

田司于寧夏

戊申武宗皇帝至大元年春三月立寧夏河渠司

秩五

品官二員叅以二僧為之

辛亥四年春三月寧夏地裂

丁丑順帝至元三年春二月立宣鎮侍衛屯田萬戶

府于寧夏

夏州北渡烏水經賀麟澤拔利干澤過沙次內橫剗沃野泊長澤白城百二十

里至朱渾水源又經故陽城澤橫剗北門突紇利泊石子嶺百餘里至阿顏泉又經大非苦鹽池六

十六里至賀蘭驛又經庫也干泊彌鵝泊榆祿渾
泊百餘里至地顏澤又經步拙泉故城八十八里
渡烏那水經胡洛鹽池紇伏干泉四十八里渡庫
結沙一曰普納沙二十八里過橫水五十九里至
什賁故城又十里至寧遠鎮又涉屯根水五十里
至安樂戍戍在河西壩其東壩有古大同城今大
同城故未濟柵也北經大泊十七里至金河又經
故後魏沃野鎮城傍金河過古長城九十二里至
吐俱麟川傍水行經破落山賀悅泉百三十二里
至步越多山又東北二十里至纈特泉又東六十
里至賀人山山西磧石有誌特捷泊吐俱麟川水
西有城城東南經拔厥那山二百三十里至帝割
達城又東北至諾真汭又東南百八十七里經古
可汗城至鹹澤又東南經烏咄谷二百七十里至古
雲中城又西五十五里有綏遠城皆靈夏以北蕃
落所居容齋三筆 河水又北過富平縣西河側

有兩山相對水出其間即上河峽世謂之為青山
 河又北逕富平縣故城又北週薄骨律鎮城城在
 河清上赫連果城也又經典農城東世謂之故城
 富平縣即此也又東北逕廉縣故城東又與北枝
 津合東北逕富平城所在分裂以
 溉田圃北流入河鄴道元水經

汝礪論曰夏州在禹貢為荒服在周為秦侯裔
 楛之地入漢設郡縣徵兵賦猶為中國有也晉
 衰而赫連熾唐末而拓跋興加以繼遷元昊之
 徒世濟其奸尋偕大號撓沸疆圉陷沒郡縣豈
 一朝一夕之故哉說者謂節度當受代而世襲

唐任人之弊也靈州密邈河壩賊之動定足以
偵壓可守而不守又橫山之險自高以臨關中
可取而不取宋形勝之弊也然抑豈特形勝之
失而已哉方鎮過於削弱而兵力不競將帥多
出親倖而賞罰蒙蔽宋之爲宋如此而况北臨
契丹無厭之兵西當靈夏捍獷之虜安得而不
敝且窮哉嗚呼拓地而能守得衆而能馭德澤
深而法制密謂之千載一時萬世無弊者幸有

見於

今日

寧夏新志卷之五

赫連夏考證

按赫連之先有劉虎者漢時匈奴南單于之苗裔也匈奴劉猛死虎代領其衆

居新興號鐵弗氏胡人謂父為鮮卑母為鐵弗因以鐵弗為姓代魏拓跋鬱律擊破之走出塞虎死

其子劉衛辰降符秦攻魏魏主拓跋圭擊之走死少子勃勃奔沒奔干再奔後秦姚興使鎮朔方襲

殺沒奔干而拜其衆恥姓鐵弗自謂帝王者為天之子遂改其姓曰赫連氏言其微赫與天連也其

非正統者曰鐵伐氏言剛銳如鐵堪伐人也勃勃字屈子小字屈丐性驕奢貪猾視民如草芥嘗置

弓劍於側群臣迂視者鑿其目笑者扶其唇諫者先截其舌然後斬之築居統萬城城高十仞基厚

二十步上廣十步宮墻高五仞其堅可以礪刀斧臺榭壯大皆雕鏤圖畫被以錦繡尤好矜大名其

四門東曰招魏南曰朝宋西曰服涼北曰平朔初
稱大夏天王再稱皇帝在位十九年殂子昌立三
年魏主燾擒殺之弟平原王定立四年吐谷
渾執獻于魏魏殺之三世共二十六年而亡

辛卯晉孝武皇帝太元十六年冬十月匈奴劉衛辰

攻魏南部魏主珪大破之衛辰走死少子勃勃犇

沒奔干納之

衛辰遣子直力靺率衆九萬攻魏南
部魏王拓跋珪引兵五六千人破

之獲直力靺衛辰爲其下所殺宗黨誅滅殆盡諸
部悉降其少子勃勃亡犇薛干部送沒奔干以女
妻之

丁未安帝義熙三年夏六月赫連勃勃自稱大夏天

王魏常山王遵等率兵襲没奔干没奔干棄其部

帥衆與劉勃勃犇秦州勃勃魁岸美風儀性辯

慧後秦王姚興見而奇之與論大事寵遇踰於勳

舊乃以為將軍使助没奔干鎮高平伺魏間隙不

果竟配以雜虜二萬餘落使鎮朔方遂叛秦會柔

然獻馬于秦勃勃掠取之襲殺没奔干而并其衆

自謂夏后氏之苗裔稱大

夏天王置百官達元龍升冬夏王勃勃破薛干部

降之遂進攻秦及南凉大破之勃勃破鮮卑薛干等三部降其衆以

萬數進攻秦三城以北諸戍諸將諫曰大王欲經

營關中宜先固根本高平險固饒沃可以定都勃

勃曰吾大業草創姚興亦一時之雄未可圖也今

專固一城彼必并力於我亡可立待不如以驍騎

風馳出其不意救前則擊後救後則擊前使彼疲

於奔命我則游食自若不及十年嶺北河東盡為

我有待興死嗣子闇弱徐取長安則吾計中矣於是侵掠嶺北諸城勃勃求婚於南涼秃髮偁檀不許勃勃帥騎二萬擊破之名臣勇將死者什六七積尸而封之號曰髑髏臺

癸丑九年春夏築統萬城勃勃以吐干阿利領將作

城於朔方黑水之南曰朕方統一天下君臨萬邦新城宜名統萬阿利性巧而殘忍蒸土築城錐入

一寸即殺作者而并築之勃勃以為忠其造兵器射甲不入則斬弓人入則斬甲匠由是器物皆精

利改元

鳳翔

戊午十四年冬十一月夏王勃勃陷長安劉義真逃

歸劉裕既取長安遂東還留子義真都督雍梁秦歸諸軍事勃勃聞之大喜召王買德問計買德曰

關中形勝之地而裕以幼子守之狼狽而歸欲急
成篡事不暇復以中原為意此天以關中賜我不
可失也青泥上洛南北之險宜先遣將軍斷之東
塞潼關絕其水陸之路然後傳檄三輔施以恩德
則義真在網罟之中不足取也勃勃乃使其子瓚
帥騎三萬向長安別將屯青泥及潼關而自將大
軍為後繼夏兵至胃義真悉召外兵閉門拒守關
中郡縣悉降于夏勃勃進據咸陽長安樵採路絕
義真將士大掠而東多載寶貨子女方軌徐行傳
弘之諫不聽赫連瓚帥衆追之弘之崩恩斷後力
戰至青泥大敗為夏兵所擒義真獨逃草中參政
段宏追尋得之束之於背單馬而歸弘之不屈叫
罵而死勃勃積人頭為京觀號觸骸臺勃
勃還長安大饗將士稱皇帝改元武昌

已未恭帝元熙元年春正月夏人陷蒲阪○夏主勃

勃還統萬

夏群臣請都長安勃曰朕豈不知長安帝都沃饒險固然統萬距魏境百

餘里朕在長安統萬必危若在統萬則魏必不敢齊河而西諸卿適未見此耳乃置南臺于長安以

赫連瓚錄尚書事

而還改元真興

甲子

末少帝景平三年文帝義隆元年嘉元年魏世祖大武帝熹始光元年

冬十二月夏

世子瓚殺其弟倫倫兄昌討瓚誅之

夏主將廢太子瓚而少

子倫瓚將兵伐倫倫拒之敗死倫兄昌襲瓚殺之并其衆歸於統萬夏主大悅立昌為太子

己丑

宋元嘉二年魏始光二年

秋八月夏主勃勃殂子昌立

改元承光

丙寅

宋元嘉三年魏始光三年

冬十月魏主自將攻夏十一月魏

主人統萬別將取蒲阪及長安

崔浩言於魏主曰今年五星并出

東方利於西伐於是遣奚斤襲蒲阪周幾襲陝城以薛謹為鄉導魏主行至君子津會天暴寒冰合

帥輕騎濟河襲統萬夏主方宴群臣魏帥奄至上下驚擾夏主昌出戰而敗退走入城門未及閉魏

豆代田帥眾乘勝入西宮宮門閉代田踰垣而出魏分兵四掠殺獲數萬謂諸將曰統萬未可得也

它年當與卿等取之乃徙其民萬餘家而還夏弘農太守不戰而走魏師乘勝長驅遂入三輔蒲阪

守將棄城奔長安奚斤遂克蒲阪夏主之弟助興自長安奔安定十二月奚斤入長安秦雍民羸皆

降于魏魏主還平城所徙夏民多道死

丁卯

宋元嘉四年魏始光四年

夏六月夏主及魏主戰于統萬敗

走上邽魏取統萬

魏主至統萬分軍伏于深谷以少衆至城下夏將狄子士降言

夏主聞有魏師召平原公定定曰統萬堅峻未易

攻拔待我擒奚斤然後徐往內外擊之蔑不濟矣

故夏王堅守以待之魏主患之乃退軍以示弱魏

軍士有亡奔夏者言魏軍糧盡步兵未至宜急擊

之夏主從之將步騎三萬出城魏長孫翰等皆言

夏兵步陳難陷宜避其鋒魏主曰遠來求戰乃避

而不擊彼奮我弱非計也遂收衆偽遁引而疲之

夏兵為兩翼欲蹙追之行五六里會有風雨從東

南來揚沙晦冥魏宦者趙倪曰今風雨從賊上來

我向彼背天不助人願攝騎避之崔浩叱之曰吾

千里制勝一日之中豈得變易賊貪進不止後軍

已絕宜隱軍分出奄擊乃分騎為左右隊以持之

魏主馬蹶而墜幾為夏兵所獲拓跋齊以身捍敵

騰馬得上身中流矢奮擊不輟夏衆大潰魏人乘

勝

勝逐夏主至城北夏泉遂奔上邽魏主微服逐奔者入城夏人覺之諸門悉閉魏主與齊等入其宮中將裙繫之繫上乘之而上僅乃得免明日入城獲夏王公卿校及婦女以萬數馬三十餘萬匹牛羊數千萬頭府庫珍寶車旗等物不可勝紀頒賜將士有差納夏世祖三文為貴人赫連定聞統萬破奔上邽魏王召奚斤等班師斤言赫連昌亡保上邽鳩合餘燼今因其危城之為易故請益鎧馬給兵萬人馬三千匹并娥清二堆使共擊夏魏主還以常山三素為征南大將軍假節鎮統萬

戊辰宋元嘉五年春二月魏人及夏戰于上邽執其

主昌以歸尋殺之夏赫連定稱帝於平涼魏人追

之敗績夏擒其二將復取長安魏將軍尉眷攻上邽夏主退屯平涼

奚斤進軍安定斤以馬瘦糧少深壘自固遣丘堆
 行督粗士卒暴掠不設儆備夏主襲堆走還城因
 乘勝日夜抄掠魏兵不得芻牧監軍侍御史安頡
 曰今猛寇遊逸于外吾兵疲食盡不一決戰死在
 旦夕等死死戰不亦可乎今欽諸將所乘馬可二
 百匹頡請募死士擊之且赫連昌勇狃無謀每自
 挑戰衆皆識之若伏兵掩擊昌可擒也奚斤難之
 頡乃陰與尉眷等謀選騎待之既而夏主來攻城
 頡出應之夏主自出搏戰軍士爭赴之夏主敗走
 頡追擒之夏平原王定收餘衆奔還平涼即位改
 元勝光昌至平城魏主以妹妻之賜爵會稽公竟
 以謀叛昇殺楊頡眷等爵不及斤斤深恥無功乃
 齎三日糧追夏主定於平涼娥清欲循水而往斤
 不從自北道邀兵走路夏軍將遁會魏亡將歸夏
 者告以魏軍食少無水夏主乃分兵夾擊之魏兵
 大潰斤清皆為所擒士卒死者六七千人丘堆奔

蒲阪夏人復取長安魏主命安頡
斬丘堆代將其眾鎮蒲阪以拒之

辛未宋元嘉八年春正月夏滅秦以秦王暮末歸殺

之夏主擊秦將姚獻敗之遂遣其叔父肅伐攻南

出降送于上邽安城中大饑人相食秦王乞伏暮末窮感與樹
殺之夷其族 夏六月夏主定擊涼吐谷渾襲敗

之執定以歸夏主畏魏人之逼擁秦民十餘萬口

其地吐谷渾王慕瓚遣騎三萬乘
其半濟邀擊之執夏主定以歸

壬申宋元嘉九年春三月吐谷渾送故夏主定于魏

魏人殺之魏既殺赫連定因進
吐谷渾王慕瓚官爵

汝礪論曰勃勃之西亡也身蕩然無所投志恐
恐以必死使薛干忌魏而不恤沒奔干吝其女
而不納則不過沙中一枯骸耳然而辯慧足以
動姚興之愚襄騫足以當拓跋之衆兼以王買
德阿利之徒爲之駿奔蒼畫封青泥以爲垣扼
潼津而作塹西吞秦涼南跨漢沔北距雲代據
統萬之堅擅百二之富亦可謂一時之雄矣夫
何狼子野性終昧遠圖妻人之女而奪人之國

受人之託而攘人之地壯臺榭畫繡之後起四
門侈大之名他如髑髏之臺慘動宇宙而鑿目
抉唇截舌之政又皆曠古之毒然卒全首領老
死牖下者狡猾有以致之也故一傳而昌鼓勇
捐以自戕再傳而定吹餘燼而遞銷二十六年
之間石火電光之業仁義不施貪殘自負欲長
其命脉以齊驅代魏烏可得哉

寧夏新志卷之六

拓跋夏考證

夏本拓跋魏之後流為党項別部唐貞觀初有拓跋赤辭者來歸賜姓李世居

平夏僖宗中和初拓跋思恭文獻通考作思敬乃以兵討黃巢有功復賜姓李拜夏綏節度使思

恭卒弟思諫代為靜難節度使唐亡歸梁卒思恭孫彝昌嗣其將高宗益作亂殺之將士立其族父

蕃部指揮仁福梁封朔方王梁亡歸唐卒子彝超嗣卒兄彝殷代之文獻通考作弟歷事唐晉

漢周北漢俱被顯爵宋太祖建隆初獻馬以王帶賜之乾德中卒太祖廢朝三日贈太師追封夏王

子克胤立以破北漢吳堡功累加檢校太尉卒太宗廢朝二日贈侍中子繼筠立授檢校司徒定難

節度觀察留後遣兵助征北漢畧太原踰年卒弟繼捧立尋率族人入朝獻地因其願留乃授彰德

拓跋夏考證

一

一

軍節度使其族弟繼遷居銀州數為邊患詔繼捧
 圖之初繼遷高祖思忠嘗從其兄思恭討黃巢射
 渭橋表鐵鶴沒羽既而戰沒僖宗贈宥州刺史祠
 於渭陽曾祖任顏仕後唐銀州防禦使祖彝景嗣
 於晉父光儼嗣於周繼遷生於銀州無定河生而
 有齒及繼捧歸宋時年二十志落落遂叛去數與
 繼捧戰不利乃歸欵後與繼捧謀寇靈州遣李繼
 隆討之執繼捧送闕下詰釋其罪封宥侯卒繼
 遷反復不臣屢勤王師真宗咸平初遣使脩貢榷
 夏州刺史定難節度益功臣號封其母衛慕氏衛
 國太夫人繼遷陷西涼中創死子德明立後德明
 追上繼遷尊號曰應運法天神智仁聖至道廣德
 光孝皇帝廟號武宗元昊追謚曰神武廟號太祖
 墓號裕陵德明小字阿移母曰順成懿孝皇后野
 利氏即位於樞前奉表歸順封西平王仍賜推忠
 保順亮節翊戴功臣號德明大起宮室于盤于山

城懷遠鎮爲興州以居娶三姓衛慕氏生元昊咩
迷氏生成遇訛截屈懷氏生成寇仁宗明道元年
卒謚曰光聖皇帝廟號太宗墓號嘉陵仁宗與皇
太后成服於苑中遣使贈卹子元昊立元昊小字
嵬理國語謂惜爲嵬富貴爲理母曰惠慈敦愛皇
后衛慕氏五月五日生國人以其日相慶賀性雄
毅多大畧善繪畫能翔製物始圓面高準身長五
尺餘曉浮圖學通蕃漢文字案上置去律常携野
戰歌太乙金鑑訣好衣長袖緋衣冠黑冠佩弓矢
從衛步卒張青蓋出乘馬以二旗引百餘騎自從
德明嘗使人以馬推易漢物下如意欲殺之元昊
年方十餘歲諫曰我戎人本從事鞍馬而以資隣
國易不急之物以爲非策又從而殺之失衆心矣
德明從之弱寇破回鶻遂立爲皇太子又數諫其
父勿臣宋德明成之曰吾久用兵疲矣吾族三十
年衣錦綺此宋恩也不可負元昊曰衣皮毛事畜

牧蓄性所便英雄之生當霸王耳何錦綺為既襲
封西平明號令以兵法勒諸部始衣白窄衫毳冠
紅裏冠項後垂紅結綬自號鬼名吾祖凡六日九
日則見其官屬官制與宋同朝賀之儀雜用唐宋
樂器其曲則唐也其官分文武班曰中書曰樞密
曰三司曰御史臺曰開封府曰朔衛宮計受納農
田群牧磨勘六司曰飛龍文司二院曰蕃漢二學
自中書令宰相樞密使大夫侍中太尉以下皆分
命蕃漢人為之文資則幘頭鞞笏紫衣緋衣武職
則冠金帖起雲鏤冠銀帖間金鏤冠黑漆冠衣紫
旋欄金塗銀束帶垂蹠蹠鞞佩解結錐短刀弓矢鞞
馬乘鯢皮鞍垂紅纓打跨鍔拂便服則紫皂地繡
盤毬紫花旋欄束帶民庶衣青綠以別貴賤每舉
兵必率部長與獵有獲則下馬環坐而飲割鮮而
食各聞所見擇取其長乃居與州地方萬里皆印
堡鎮號州郡凡二十有二河南之州九曰靈曰洪

曰宥曰銀曰夏曰石曰鹽曰南威曰會河西之州
九曰興曰定曰懷曰朮曰涼曰甘曰肅曰瓜曰沙
熙秦河外之州四曰西寧曰樂曰廓曰積石其地
饒五穀尤宜稻麥甘涼之間以諸河為溉與靈則
有古渠曰唐來曰漢延皆支引黃河故灌溉之利
歲無旱澇之虞其民一家號一帳男年登十五為
丁率二丁取正軍一人每負贍一人為一抄四丁
為兩抄餘號空丁願隸正軍者得射他丁為負贍
無則許射正軍之疲弱者凡正軍給長生馬駝各
一匹團練便以上帳一弓一箭五百馬一橐駝五
旗鼓鎗劍棍槔抄袋被種渾脫背索鞦韆斤斧箭
牌鐵瓜箇各一刺史以下無帳與旗鼓各馬駝一
箭三百幕梁一謂織毛為幕而以木為梁也凡兵
三人同一幕有砲手二百人號潑喜陡立旋風砲
於橐駝鞍縱石如拳得漢人勇者為前軍號撞令
即着脫却無他伎者遷河外耕作有左右廂立十

二監軍司曰左廂神勇曰石州祥祐曰宥州嘉寧
曰韋州靜塞曰西壽保泰曰卓羅和南曰右廂朝
歌曰甘州甘肅曰瓜州西平曰黑水鎮燕曰白馬
強鎮曰黑山威福委豪右分統其衆自河北至千
臘蕩山七萬人以備契丹河南洪州白豹鹽州天
都韋精山五萬人以備環慶鎮戎原州左廂宥州
五萬人以備鄜延麟府右廂甘州三萬人以備西
蕃回紇賀蘭駐兵五萬靈州五萬興州興慶府七
萬人爲鎮守總五十餘萬別有擒生十萬興靈之
兵精練者又二萬選豪族善弓馬者五千人迭直
號六班直月給米二石鐵騎三千分十部爲前軍
乘善馬披重甲刺砍不入用鈎索絞聯雖死馬上
不墜遇戰則先出鐵騎突陣陣亂則衝擊之步兵
挾騎以進每有事於西則自東點集而西有事於
東自西點集而東中路則東西皆集發兵以銀牌
召部長面受約束用兵多立虛砦設伏兵包敵戰

別大將居後或據高險其人能寒暑饑渴出戰率
用隻日避晦日齋糧不過一旬弓用皮弦矢用沙
柳箬惡雨雪晝舉煙揚塵夜篝火以為候不心奔
適九敗三日輒復至其處捉人馬射之號曰殺鬼
招魂或縛草人埋於地衆射而還篤信機鬼尚詛
呪每出兵則先卜以艾灼羊髀骨謂之死踐焦卜
師謂之願覘視其兆上處為神明近脊處為主位
近傍處為客位蓋其俗以所居正寢中一間以奉
鬼神人不敢居而主客之位則近脊而傍也故取
象於羊骨如此又夜以羊焚香呪粟以食之食盡
則搯其首乃殺羊視其腸胃通則兵無阻心有血
則不和謂之生踐焦又擗竹於地若撲著以求數
謂之擗筭又以矢擊弓弦審其聲知敵至之期與
兵交之勝負及六畜之災祥五穀之豐稔俗皆土
屋惟有命得以瓦覆之以鬼名守全等主謀議以
鍾鼎臣典文書以成逋克等主兵馬野利仁榮主

蕃學元昊自製蕃書命仁榮演譯之成十二卷字
形體方整類八分而畫頗重復教國人以此紀事
又譯孝經爾雅四言雜字為蕃語仁宗寶元初稱
皇帝凡五娶一大遼與平公主二宣穆文皇后沒
歲氏生諒祚三憲成皇后野利氏四沒移氏五索
氏在位十七年改元開運一年廣運二年大慶二
年天授禮法延祚十一年殂謚曰武烈皇帝廟號
景宗墓號太陵朝廷遣官祭吊賜賻長子諒祚立
小字甯令哥國語謂懽喜為甯令兩岔河名也沒
藏氏與元昊出獵至此而生遂名焉寔慶曆七年
丁亥三月六日也方期歲卽位朝廷封為夏國主
毋族訛龐專國諒祚討殺之已而請去蕃禮從漢
儀詔許之又表求太宗御製草詩隸書石本且進
馬求九經唐史冊府元龜及本朝正至朝賀儀詔
賜九經還所獻馬英宗治平間屢入冠在位二十
年殂改元延嗣寧國一年大祐垂聖三年福聖承

道四年解都六年拱化五年謚曰昭英皇帝廟號
毅宗基號安陵長子秉常立恭肅章獻皇后梁氏
所生也秉常幼梁氏攝政神宗熙寧二年冊為夏
國主表請去漢儀復用蕃禮詔許之尋被幽執秉
常在位二十年殂改元乾道二年天賜禮盛國慶
五年大安十一年天安禮定一年謚曰康靖皇帝
廟號惠宗基曰獻陵長子乾順立昭簡文穆皇后
梁氏所生也哲宗元祐二年封夏國主仍節度西
平王建國學設子弟員三百立養賢務以廩食之
遼以成安公主下嫁金滅遼乃稱藩於金自後宋
使至者保見之始用敵國禮高宗紹興九年靈芝
產於國中乾順作靈芝歌在位五十四年殂改元
天儀治平四年天祐民安八年永安三年貞觀十
三年雍寧五年元德八年正德八年大德五年謚
曰聖文皇帝廟號崇宗基號顯陵長子仁孝立正
史作天祈尊其母曹氏為國母納後岡氏上尊號

曰制義去邪乃達學立教釋奠孔子而帝尊之策
舉人立唱名法復達內學選名儒主之增修法律
賜名鼎新立通濟監鑄錢立翰林院以焦景顏王
儉等為學士俾修實錄移置中書樞密於內門外
大禁奢侈封制蕃字師野利仁榮為廣惠王在位
五十五年殂改元大慶四年人慶五年天盛二十
一年乾祐二十四年謚曰聖德皇帝廟號仁宗墓
號壽陵長子純佑立章獻欽慈皇后羅氏所生也
改元天慶在位四十年從弟李安全廢之而自立
純佑尋殂謚曰昭簡皇帝廟號桓宗墓號莊陵安
全立之四年降于元又二年殂在位六年改元應
天四年皇建二年謚曰敬穆皇帝廟號襄宗墓號
康陵有子曰承禎未立族子遵頊立改元光定金
封為夏國王寧宗嘉定十六年元兵攻夏傳國于
其子德旺遵頊在位十三年又三年殂謚曰英文
皇帝廟號神宗德旺改元乾定四年以憂悸殂廟

號憲宗弟子眈立二年元主克其城邑繫眈以歸
自宋太平興國七年繼遷開基七十二主二百五

十八年
夏亡

已五唐太宗文武皇帝貞觀三年冬閏十二月党項

別部拓跋赤辭降

賜姓李置靜邊等州以處之
其後析居夏州者號平夏州

辛丑僖宗皇帝中和元年春二月宥州刺史拓跋思

恭舉兵討黃巢

壬寅二年春正月以拓跋思恭為京城三面都統

庚午

李存勗岐李茂貞唐天祐七年梁主晃開平四年

夏四月梁夏州亂殺

節度使李彝昌以其族父李仁福代之

癸巳

唐明宗李嗣源長興四年

春二月唐定難節度使李仁福卒

子彝超嗣 三月唐以李彝超為彰武留後安從

進為定難留後彝超拒命

先是河西諸鎮皆言李仁福潛通契丹會仁福

卒以其子彝超徙為彰武留後安從進代為定難留後四月彝超上言為軍民擁留未得赴鎮詔遣

使趣秋七月唐安從進討李彝超不克引還

安從進攻

夏州州城赫連勃勃所築斷鑿不能入又党項萬餘騎抄掠糧餉官軍無所芻牧關中民輸運困竭彝超登城謂從進曰夏州貧瘠非有珍寶蓄積可以充朝廷貢賦也但以祖父世守此土不欲失之

辛與表聞許其自新詔從進引兵還自是夏
州輕朝廷每有叛臣必陰與之連以邀賂遺冬十

月唐以李彝超為定難節度使彝超上表謝罪故有是命

乙未唐主從珂清泰二年春二月唐夏州節度使李彝超卒兄

彝殷代之

甲辰晉出帝重貴開運元年春二月晉定難節度使李彝殷復

契丹以救晉

辛亥周太祖郭威廣順元年北漢主劉崇乾佑四年夏四月周夏州附于北

漢

乙卯周世宗榮顯德二年春正月周遣使如夏州李彝殷以折德柔亦為節

度使耻之塞路不通世宗謀於宰相對曰夏州邊鎮朝廷每加優惜府州補小得失不係輕重且宜

撫諭彝殷廢全大體世宗曰德柔數年以來盡力以拒劉氏柰何一旦棄之且夏州惟產羊馬貿易

百貨悉仰中國我若絕之彼何能為乃遣供奉官齎詔書責之彝殷惶恐謝罪

丁卯宋乾德五年秋七月定難節度使李彝興卒于克敵

嗣彝興即彝殷克敵即光敵嗣宋避宣祖太宗諱故改之

戊寅宋太宗皇帝太平興國二年夏五月定難節度

使李克叡卒繼筠嗣

己卯四年秋七月定難留後李繼筠卒弟繼捧嗣

壬午七年夏五月定難留後李繼捧入朝獻銀夏綬

宥四州六月繼捧弟繼遷叛走地斤澤夏州自李思恭以來

未嘗親朝中國至是繼捧率其族人入朝帝嘉之

賜資甚厚繼捧陳其諸父昆弟多相對怨乞納其

境內夏綬銀宥四州留京居之帝為遣使如夏州

謀總麻以上親赴闕以曹光實為四州都巡檢使

時繼捧族弟定難軍都知蕃落使繼遷留居銀州

聞使至乃詐言乳母死出葬於郊遂與其黨數十

人奔入地斤澤出其祖像以示戎人戎人冬十一

拜泣從者日衆澤距夏州東北三百里

月以李繼捧為彰德節度使

甲申雍熙元年冬十月知夏州尹憲襲李繼遷破走

之憲與曹光實襲繼遷於地斤澤大破之斬首五百級焚四百餘帳繼遷與其弟繼冲遁免獲其

母妻而還

乙酉二年春二月李繼遷誘殺都巡檢使曹光實遂

襲銀州據之繼遷自地斤澤敗轉徙無常漸以疆大西人以李氏世著恩德多歸之於

是率眾攻麟州使人給都巡檢使曹光實曰我數

告北虜窘願講甥舅之禮期日會於葭蘆川納降

尤實信之且欲擅其功故不與人謀至期繼遷設
伏止領數十人近城迎光實光實從百騎赴之繼
遷前導北行至其地忽舉手揮鞭遣知秦州田仁
伏兵盡起光實被害遂襲據銀州

朗等將兵討李繼遷夏四月徵仁朗還五月副將

王侁擊李繼遷走之銀麀夏州悉內附繼遷陷三族仁朗行

次綏州請益兵留月餘俟報時繼遷乘勝進攻撫

其困以大兵臨之分遣疆弩邀其歸路虜成禽矣

部署已定帝聞三族已陷徵仁朗還下御史獄劾

問請益兵及陷三族狀仁朗對曰三族去綏州遠

非元詔有所救也臣已定禽繼遷策會詔至不果

帝怒特貸死竄商州是月侁等出銀州北破悉利

諸砦麟州諸蕃皆請納馬贖罪助討繼遷侁與所

部兵入濁輪川斬賊首五千級繼遷遁去郭守文

復與尸憲擊鹽城諸蕃焚千餘帳由是銀麟夏三

州蕃百二十五族

內附戶萬八千餘

丙戌三年冬十二月李繼遷請昏于契丹契丹以女

歸之

繼遷率五百騎款契丹境言願昏大國以作藩輔契丹以耶律襄女號義成公主歸之

戊子端拱元年夏五月以李繼捧為定難節度使賜

姓名趙保忠

李繼遷侵擾日甚趙普復請命繼捧鎮夏州帝召見加賜而遣之且謂曰

若繼遷歸款當授以官也

庚寅淳化元年冬十二月契丹封李繼遷為夏王

辛卯二年秋七月李繼遷請降以為銀州觀察使賜

姓名趙保吉

先是趙保忠至夏州言繼遷悔過歸款詔授繼遷銀州刺史至是與保忠

戰於安慶澤繼遷中流矢遁去轉攻夏州繼遷歸
欵卒表謝罪遂有是命且以其子德明為管内藩
落使行冬十月趙保忠叛降契丹契丹封為西平
軍司馬王

甲子五年春正月趙保吉寇靈州以李繼隆為河西

都部署討之三月李繼隆入夏州執趙保忠送京

師保忠聞繼隆將至先挈其母與妻子壁野外乃

督繼隆進軍及師壁境保吉因夜襲保忠營欲併

其衆保忠方寢聞難作單騎走還城其指揮使趙
光嗣閉之別室開門迎繼隆夏四月削趙保吉姓
繼隆執保忠送汴保吉遁去

名隋夏州城帝以夏州深在沙漠奸推因以竊據

來煩為關右之患若遂廢之萬世利也乃詔墮之遷其民於綏銀五月賜趙保忠

爵宥罪侯保忠至汴帝詰責而釋之責授秋七月

李繼遷遣使來貢繼遷獻馬謝罪又遣弟延信入

觀言遠叛事出保忠帝召見慰

之諭

乙未至道元年夏六月以李繼遷為鄜州節度使繼

遷不奉詔繼遷遣押衙張浦以良馬素駝來獻乃

拜繼遷鄜州節度使繼遷不受

丙申二年夏四月遣李繼隆等分道討李繼遷初白守蔡

護餉盡為繼遷所奪帝怒命李繼隆為環慶等州都

部暑將兵討之呂端請發兵由麟府鄜延環慶三

道以構平夏襲其巢穴則靈武之圍解矣帝命繼

隆出環丁罕出慶范廷召出延王超出秋八月李

夏張守恩出麟五路進討直趨平夏

繼隆副將范廷召遇李繼遷于烏白池擊敗之繼

隆不見虜而還諸將分道並進期抵烏白池繼隆

遣其弟繼和馳奏以環州道迂欲

自青岡峽直趨繼遷巢穴不及援靈武遂發兵與

丁罕合行十日不見虜引軍還張守恩見虜不擊

獨范廷召與王超至烏白池與賊遇超持重不進

其子德用年十七為先鋒轉戰三日虜遂却又先

絕其要害歸師
肅然虜不敢近

丁酉三年冬十二月李繼遷請降以為定難節度使

復姓名趙保吉

繼遷表求蕃任真宗皇帝方在諒陰姑從其請又以夏綏銀有靜五

州與之張浦亦遣還

辛丑真宗皇帝咸平四年秋八月以張齊賢為涇原

諸路經畧使

帝以趙保吉雖入貢而抄掠益甚乃遣齊賢行邊齊賢言靈武孤城必難

固守通判永興軍何亮復上安邊書言靈武地方千里表裏山河決不可舍楊億言棄之便輔臣咸以為不可失帝惑之李沆言莫若密召州將使部分軍民空壘而歸帝不從以王超為西面行營都

部署將步騎
六萬援靈州

壬寅五年春三月趙保吉陷靈州知州事裴濟死之

濟知靈州謀輯八鎮興屯田之利民甚賴之保吉大集蕃部來攻濟被圍餉絕刺指血染奏求救兵不至城遂陷濟死焉保吉以州為西平府居之

癸卯六年春二月以六合酋長潘羅支為朔方節度

使知鎮戎軍李繼和言潘羅支願戮力討趙保吉請授以刺史乃授朔方節度使靈州西面都巡

使檢冬十二月趙保吉陷西涼殺丁惟清潘羅支會

蕃部擊敗之保吉走死于德明嗣保吉陷西涼殺丁惟清於是潘

羅支偽降保吉受之不疑羅支遽集六合蕃部合
 擊之保吉大敗中流失劍甚奔還死於靈州境上
 年四十二子德明年二十三矣保吉將死成德明
 曰爾當傾心歸順朝廷如一兩表未蒙開納但連
 上封章以祈見聽德明乃遣使告哀於契丹契丹
 贈保吉尚書令尋封德明為西平王帝詔德明令
 審圖去就知鎮戎曹瑋上言可因其國危子弱願
 假臣精兵出其不意擒德明送闕下復河南為郡
 縣此其時
 也不報

甲辰景德元年夏六月宥罪侯趙保忠卒

保忠狀貌
雄毅居環

列奉朝請常快快
不自得至是卒

丙午三年冬十月趙德明請降詔以為定難節度使

向敏中言德明屢表歸欵復奉誓表請藏盟府帝嘉之乃遣使授德明檢校太師兼侍中充定難軍節度使封西平王給奉如內地因責子弟入質德明謂非先世故事不遣惟獻駝馬謝恩而已未幾契丹亦冊為大夏國王

庚戌大中祥符三年冬十二月夏州饑西夏管內饑趙德明表求

粟百萬朝議不知所出王旦曰第詔德明云已敕有司具粟百萬於京師其遣衆來取德明得詔慚曰朝廷有人

戊辰仁宗皇帝天聖六年夏五月趙德明使其子元

昊襲回鶻甘州取之以元昊襲破回鶻奪甘州遂立為太子

壬申明道元年冬十一月夏王趙德明卒子元昊嗣

是歲封德明為夏王未幾卒年五十一贈太師尚書令兼中書令遣楊官授元昊三使封西平王年二十三矣契丹亦遣使冊為夏國王既而避其父諱改宋明道為顯道稱於其國中

甲戌景祐元年秋七月趙元昊反寇環慶慶州柔遠

檢寇通攻後橋諸堡破之元昊稱兵報仇入寇慶州緣邊都巡檢楊遵與戰敗績環慶都監齊宗矩援之被執既而放還下詔約束冬十月趙元昊進之元昊改元開運尋改廣運

毒弑其母衛慕氏母族人山喜謀殺元昊事覺元昊醜其母殺之沉山喜之族於

河遣使來告哀

乙亥二年冬十二月吐蕃唃廝囉大敗趙元昊于河

湟

趙元昊遣蘇奴兒擊唃廝囉兵敗被執元昊自領衆攻屠猶牛青唐宗哥帶星領諸城夏兵溺宗

哥河及饑死過半又併兵臨河湟唃廝囉壁善州不出元昊乃渡河挿幟識其淺唃廝囉潛使人移植深

處及大戰元昊潰歸士卒視幟而渡溺死者什八九鹵獲甚衆唃廝囉來獻捷詔加保順軍留後

丙子三年冬十二月趙元昊侵回鶻取瓜沙肅州元昊

既悉有夏銀宥綏靜靈鹽會勝甘涼又取瓜沙肅仍居興州阻河休賀蘭山為固地方萬里改元大慶

寶元元年冬十月趙元昊殺其叔父山遇稱帝于夏

州元吳遣使詣五臺供佛以窺河東道路既還與

道並入其叔父山遇數勸勿反不聽山遇遂挈妻子來降知延州郭勸執還元吳元吳殺之遂稱帝

改元天授禮法延祚國號夏遣使奉表曰臣祖本

出帝胃當東晉之末運創後魏之初基遠祖思恭

當唐季率兵極難受封賜姓祖繼遷心知兵要手

握乾符大舉義旗悉降諸部臨河五鎮不旋踵而

歸沿邊七州悉差肩而克父德明嗣奉世封勉從

朝命真王之號夙感於頒宣尺土之封顯蒙於割

製三十年邊情善守五千里職貢常輸臣偶因端

間輒生狂斐制小番之文字改大漢之衣冠衣冠

既就文字既行禮樂既張器用既備吐蕃塔塔張
校交河莫不從伏稱王則不喜稱帝則是從輻輳
巽朔山呼齊舉伏願一埃之地土建為萬乘之邦
家於時再讓靡遑群集又迫事不得已顯而行之

遂以十月十一日郊壇備禮為世祖始文本武興
法建禮仁孝皇帝國稱大夏年號天授禮法延祚
伏望皇帝陛下睿哲成人寬慈及物許以西郊之
地冊為南面之君敢竭愚庸常敦權好魚來雁往
任傳隣國之音地久天長永鎮
邊方之患至誠歷懇仰候帝俞
十二月以夏竦為

涇原秦鳳安撫使范雍為鄜延環慶安撫使經畧

夏州以竦知涇州與維俱兼經畧使又命天章閣

侍制龐籍體量陝西詔籍就竦計事竦條陳
十事一教習疆弩以為奇兵二羈縻屬羌以為藩
籬三詔唃廝囉并力破賊四度地勢險易遠近若
柵多少而增減屯兵五詔諸路互相應援六募土
人為兵以代東兵七增置弓手壯丁以備城守八
併並邊小砦以完兵力九聽關中民入粟贖罪以
贍邊計十損並邊冗官以紓饋餉朝廷多採用之

己卯二年夏六月削趙元昊賜姓官爵

元昊表至群臣皆曰元昊

小醜也請出師討之諫官吳育獨言宜援國初江南故事稍易其名可以附順而收之不報未幾下詔削奪元昊官爵絕互市揭榜於邊募人能擒元昊若斬首獻者即授定難節鉞已而元昊又遣賀正年齋煆書納旌節及所授敕

冬十一月夏人寇

保安軍巡檢指揮使狄青擊敗之

青初以善騎射為騎御散直從

西征戰安遠諸砦皆克捷臨敵披髮帶銅面具出入賊中皆披靡莫敢當至是元昊寇保安軍鈴轄

盧守勤使青擊走之

庚辰康定元年春正月元昊寇延州副總管劉平石

元孫戰沒

元昊將攻延州詐遣人道欵於雍雍信之不設備既而元昊盛兵攻保安軍邨

延副總管劉平石元孫屯慶州雍以書召之元昊

既破金明砦乘勝至延州城下雍閉門監守平元

孫聞之督騎兵晝夜倍道先趨延州爭門至三川

口西適邨延都監黃德和迎檢萬侯政郭遵皆與

平合步騎萬餘結陳東行五里許與賊遇平與賊

皆為偃月陳賊兵涉水為橫陳連擊退之賊復蔽

盾為陳官軍復擊卻之奪盾殺獲及溺死者近千

人平中流矢日暮則以輕兵薄戰官軍小卻黃德

和居陳後望見軍卻率麾下走保西山衆從之皆

潰平遣其子宜孫馳追德和還兵併力德和不從

驟馬遁赴甘泉平遣軍校仗劔遮留得千餘人轉

鬪三日賊退還水東平率餘衆保西南山立七柵

自固平旦賊酋舉鞭麾騎自山四出合擊絕官軍

為二平遂與元孫等皆沒於賊會大雪賊解去延

州得不陷詔殿中御史文彥博即河中置獄問狀黃德和坐要斬范雍貶知安州而贈平元孫官

夏五月元昊陷塞門諸砦執砦主高延德以去又

佐郎張方平上平戎十策其畧以為宜屯重兵河東示以形勢賊入寇必自延渭而興州巢穴之守

必虛我師自麟府渡河不十日可至此秋八月以所謂攻其所必救形格勢禁之道也

范仲淹兼知延州延州諸砦多失守仲淹請自行

萬八千人分六將領之日夜訓練量賊衆寡使更出禦敵人聞之相戒曰無以延州為意今小范老

子腹中自有數萬甲兵不比大范老子可欺也十一月詔鄜延涇原兩路進兵取正月上旬討賊范

仲淹上論未宜進討疏曰臣聞昨賊界投來山遇嘗在西界掌兵言其精兵纔及八萬餘皆老弱不

任戰鬪始賊衆深入蓋爲官軍以分地自守旣不能獨禦賊鋒又不能併力掩殺彼得其便繼爲邊患其虜劫生口牛羊亦不曾追奪故安然往來如蹈無人之境今延州東路合隄防之處已令朱吉與東路巡檢駐軍延安寨其西路亦委王信張建侯狄青黃世寧在保安軍每日訓練及令西路巡檢劉政在德青寨張宗武在政縣密令分布兵馬俟賊奔衝放令入界會合掩擊之數路並入且併衆力禦敵或破得一處卽便邀擊別路其環慶路已遣通判馬端往報總管司令一如鄜延路設備如此則可以乘勝而破賊也今須令正月內起兵則軍馬糧草動踰萬計入山川險阻之地塞外雨雪暴露僵仆使賊乘之所傷必衆况鄜延路已有會合次第不患賊先至也賊界春暖則馬瘦人饑其勢則易制及可優其耕種之務縱出師無大獲亦不至有亡虞自劉平陷沒之後修城壘運兵甲

積糧草移士馬大為攻守全勝之策非為小利而
動如重兵輕舉萬一有失將何繼之則必關朝廷
安危之憂非止邊患之謂也苟自今賊至不擊是
臣之罪也兵法曰戰道必勝主曰無戰必戰可也
戰道不勝主曰必戰不戰可也臣昨於九月末至
邠延路便遣葛懷敏朱觀入界控襲族帳蓋與今
來時月不同非前勇而後怯今若承順朝旨不能
持重王師為大患雖加重責不足以謝天下苟伺
春暖舉兵尤未能失策且元昊稔惡以來欲自尊
大必被奸人所誤謂國家太平日久不知戰鬪之
事又謂邊城無備所向必破所以恣惰慢之心侵
擾不已今邊鄙漸飭度其已失本望况已下敕招
攜族帳首領臣亦遣人探問其情欲通朝廷柔遠
之意使其不僭中國之號而修時貢之禮亦可俯
從今邠延是舊日進貢之路蕃漢之人頗相接近
願朝廷廣天地包荒之量存此一路今諸將勒兵

嚴備賊至則擊但未行討伐容臣示以恩義歲時
之間或可招納如先行攻掠恐未能擒其聚落如
白豹之功官軍既退我類復居狼心重報增其怨
毒邊患愈滋無時敢暇若天兵屢動不立大功必
為夷狄所輕臣又近召張亢到延州熟議亦稱願
與狄人相見於界上臣所以乞存此一路者一則
懼春初盛寒士氣愈怯二則恐隔絕情意偃兵未
期若施臣之鄙計恐是平定之一端苟歲月無效
遂舉重兵取綏宥二州擇其要害而舉之屯田營
田作持久之計如此則橫山一帶蕃漢人戶去吳
賊相遠懼漢兵威逼可以招降或即奔竄則是去
西賊之一臂柘疆制寇無輕舉之失也于是太子
中允館閣校勘歐陽修又以三事上言臣伏見自
元昊叛逆陝西用兵以來為國言事者衆矣臣切
為三策以料賊情然臣迂懦不識兵之大計始猶
遲疑未敢自信今兵興既久賊形已露如臣素料

頗不甚遠故切自謂可以取萬一耳謹脩以聞惟
陛下仁聖寬其狂妄之誅夫關西弛備而民不見
兵者二三十年矣賊萌亂之初藏形隱計卒然而
來當是時吾之邊屯寡弱城堡未修民習久安而
易驚將非素選而易敗使其羊豕豨突可以奮而
深入然國威不屈民力未疲彼彼得城而居不能久
守虜掠而去吾以邀擊其歸此下策也故賊知而
不爲戎狄侵邊自古爲患其攻城掠野敗則走勝
則來蓋爲常事此中策也故賊兼而用之若夫假
僭名號以威其衆先擊吾之易取者一二以悅其
心然後訓養精銳爲長久之謀故其來也雖勝而
不前不敗而自退所以誘吾兵之勞也或擊吾之
東或擊吾之西乍入所以使吾分兵備多而不得
少息也吾欲速攻賊方新銳坐而待戰彼則不來
如此相持不三四歲兵已老民已疲不幸又遇水
旱之災調歛不勝而盜賊群起彼方奮其全銳擊

吾困弊可以使吾不堪其忿困而出攻決於一戰
彼以逸而待勞亦可也幸吾苦兵計未之出遂求
通聘以邀歲時之賂度吾窘急不得不從亦可也
是吾力益窘則賊謀無施不可此兵法所謂不戰
而廢人兵者此上策也賊今方用之今三十萬之
兵食於西者二歲矣又有十四五萬之鄉兵不耕
而自食其民自古以來未有四十五萬之兵連年
仰食而國力不困者也臣聞元昊之爲賊威能畏
其下恩能死其人自初僭叛屢書以上逾年而不
出則鋒不可當執却蕃官獲吾將帥多禮而不殺
其克謀所蓄皆非倉卒者也奈何彼能以上策而
疲吾吾不自知其已困彼爲計以撓我我無長策
以制之哉夫訓兵養士伺隙乘便用間出奇此將
帥之職也所謂闡外之事而君不御者可也至於
外料敵之謀內察國之勢知彼知此因謀制敵此
朝廷之計也所謂廟筭而勝者也不可以不思今

賊謀可知以久而疲我耳吾勢可察而西人已困矣誠能豐財積粟以紓西人而強國壯兵則賊謀沮而廟筭得矣夫兵攻守而已然皆以財用為強弱也守非財用而不久此不待言也試言其故昔秦席六王之強資以事胡卒困天下而不得志漢因文景之富力三舉而纔得河南隋唐突厥吐蕃常與中國相勝敗擊而勝之有矣未有一舉而滅者然秦漢尤強其所難攻者今元吳之地是自劉平陷沒賊鋒熾銳未嘗挫衄攻守之計未知所得天威所加終期於掃盡然臨邊之將尚未得賊釁隙挫其亮鋒是攻守皆未有休息之期而財用不能為長久之計臣未見其可也四十五萬之人坐而仰食然關西之地物不如多關東所有莫能運致掎克細碎既以無益而罷去矣至於鬻官入粟而下無應者改推貨之法而商榷不行是四十五萬之人唯取足於西人何為而不困困而不起

為盜者須水旱耳外為賊謀之所疲內遭水旱之多故天下之患可勝道哉夫關西之物不能加多則必通其漕運而致之漕運已通而關東之物不充則無得而西矣故臣以謂通漕運盡地力推商賈三術並施則財用足而西人紓國力全而兵可以久以守以攻惟上所使夫小瑣目前之利既不足為長久之謀非旦夕而可効故為長久之計者初若迂愚而可笑在必而行之則其利溥矣故臣區區不敢避迂愚之責上便宜三事惟陛下裁擇其一曰通漕運臣聞今為西計者皆患漕運之不通臣謂但未求之耳今京師在汴漕運不西而人之習見者遂以為不能西不知秦漢隋唐其都在雍則天下之物皆可至西也山川地形非有變易於古其路皆在昔人可行今日胡為而不可漢初遂漕山東粟數十萬石是時運路未脩其後武帝益脩渭渠至漕百萬餘石隋文帝時汭水為倉轉

相運致關東汾晉之粟皆至渭南運物最多其遺
倉之迹往往皆在然尚有三門之險自唐裴耀卿
又尋隋迹於三門東西置倉開山十八里為陸運
以避其險卒沂河入渭當時歲運不減二三百萬
石其後劉晏遵耀卿之路悉漕江淮之米以實關
西後世言能經財利而善漕運者耀卿與晏為首
今江淮之米歲入於汴者六百萬石誠能分給關
西得一二萬石足矣今兵之食汴漕者出戍甚衆
有司不惜百萬之粟分而及之其惠者在三門阻
其中耳今宜峻汴渠使歲運不阻然後按求耀卿
之迹不憚十許里陸運之勞則河漕通而物可致
且紆關西之困使古無法尚當為之况昔人行之
未遠今人行之而豈難哉按耀卿與晏初治漕時
其得尚少至末年其得十倍是可久行之法明矣
此水運之利也臣聞漢高祖之入秦不由東關而
道南陽過丹折而入武關曹操筆起兵誅董卓亦

然自南陽道丹折而入長安是時張濟又自長安
出武關奔南陽皆自古用兵往來之徑臣嘗至南
陽問其遺老自鄧西北至求與六七百里今小商
賈往往行之初漢高祖入關其兵十萬夫能容十
萬兵之路宜不甚狹而險也且自維陽爲都行者
皆趨東關其路久而遂廢今能技求而通之自武
昌漢陽郢復襄陽梁洋金商均房光化泂漢之地
十一二州之物皆可漕而頓之南陽爲輕車人輦
而遞之募置遞兵爲十五六鋪則十餘州之物日
日入關而不絕泂漢之地山多美木近漢之人仰
足而有餘以造舟車甚不難也前日陛下深卹有
司之勤內賜禁錢數十萬以給西用而道路艱遠
輦運踰年不能畢至於軍裝輸送多苦秋霖邊
州已寒冷服尚滯於路其艱如此夫使州縣網吏
遠輸京師復從京師轉肩艱滯然後得西豈若較
南陽之旁郡度其道里入於武關與至京師近遠

等者與尤近者皆使置輸於關西京師之用有不足則以禁帑賜有司者代而充用其迂曲簡直利害較然矣此陸運之利也其二曰盡地利臣聞昔之畫財利者易為功今之言財利者難為術昔者之民賦稅而已故其不足則煮海鑄山榷茶與酒征關市而筭舟車尚有可為之法以苟一時之用自漢迄今其法日增其取盜細而取民之法盡矣昔者賦外之征以備有事之用今盡取民之法於無事之時悉以冗費而糜之矣至卒然有事則無法可增然猶有可為者民作而輸官者已勞而游手之人方逸地之產物者耕不得代而不墾之士尚多是民有遺力地有遺利此可為也况歷視前世用兵者未嘗不先營田漢武帝特兵興用乏趙過為代田人犁之法以足用趙充國攻西羌議者爭欲出擊而充國思全勝之策能忍而待其弊至追詔罷兵而治屯田於極邊以游兵而防鈔寇

則其治田不為易也猶勉為之方曹操屯兵許下
時強敵四面以今視之疑其旦夕戰爭不暇然用
棗祗韓浩之計數置田官募民而田近許之地歲
得數百萬石其後郡國皆自積穀數百萬隋唐田
制尤廣不可勝舉其勢難而難田莫若充國迫急
而不暇田莫如曹操然皆勉焉不以迂緩而不田
者知地利之溥而可以紓民勞也今天下之土不
耕者多矣臣未能悉言請舉其近者自京邑以西
地之不闢者不知其數非土之瘠而弃也蓋人不
勤農與夫役重而逃亦久廢之地其利數倍於營
田今若督之使勤以免其役則願耕者衆矣臣聞
鄉兵之不便於民議者方議之矣充兵之人遂棄
農業託云教習聚而飲博取資其家不碩無有官
吏不加禁父兄不敢詰家自以為患也河東河北
關西之鄉兵此猶有用若京東西者平居不足以
備盜而水旱適足以為賊其尤可甚患者京西素

貧之地非有山澤之饒民唯力農是仰而三夫之家一人五夫之家二人為游手凡十八九州以上言之尚可四五萬人不耕而食是相靡耗而重困也今誠能盡駟之使耕於棄地官貸而種歲田之入與中分之如民之法募吏之習田者為之田官優其課最而誘之則民願田者衆矣太宗皇帝時嘗貸陳蔡民錢使市牛而耕真宗皇帝時亦用耿望之言買牛湖南而治屯田今湖南之牛歲買乎北者出京西若官為買之不難得也又宜重為法以困所謂私牛之客私牛之客不容於民而樂為官耕凡民之已有牛者使自耕則牛無不足而官市者不多且鄉兵本農也籍而為兵遂棄其業今幸其去農未久尚可復駟還之田畝使不得群游而飲博以為父兄之患此民所願也二夫之力以逸而言歲任耕廢田一項使四五萬人皆耕而久廢之田利又數倍則歲穀不可勝數矣京西之地

北有大河南至漢而西接關若又通其水陸之運
所在積穀惟陛下詔有司而移用之耳其三曰權
商賈臣聞秦廢王法啓兼并其上侵公利下刻細
民爲國者之患久矣自漢以來欲爲法而抑奪之
然不能也蓋爲國者與利日繁兼并者趨利日巧
其至甚也商賈坐而擁利其故非它由與利廣也
夫與利廣則上難專必與下共之然後通流而不
滯然而爲今議者方欲奪商之利一歸於公上而
專之故奪商之謀益深則爲國之利益損前日有
司屢變其法法每一變則一歲之間所損已數百
萬議者不知利不可專但云變法之未當變而不
已其損愈多夫欲十分之利皆歸於公至其虧少
十不得三不若與商共之常得其五也今爲國之
利多者茶鹽耳茶自變法以來商賈不行一歲之
失數年莫補所在積朽棄而焚之前議者屢言三
說之法爲便有司既詳之矣今誠能復之使商賈

有利而通行則上下濟矣解池之鹽積若山阜令
宜暫下其價誘群商而取之先為令曰三年將復
舊價則貪利之商爭先而取之夫茶者生於山而
無窮鹽者出於水而不竭賤而發之二年十未減
其一二夫二物之所以貴者以能資國之錢幣耳
令不散而二物惜朽壞也夫大商之能蕃其貨者
其必錙銖躬自鬻於市哉必有販夫小賈就而分
之販夫小賈無利則不為故大商不妬販夫之分
其利者恃其貨博雖取利少貨行流速則積少而
為多也今為大國者有無窮不竭之貨及妬大商
之分其利寧使無用而積為朽壞何哉故大商之
善為術者不惜利而誘販夫大國之善為術者不
惜利而誘大商此商賈共利取少而致多之術也
今又商賈之難以術制者以其積貨多而不急故
也利厚則來利薄則止不可以號令召也故每要
有司變法利既薄則小商無利而不能行則大商

方幸小商之不行適得獨賣其積貨尚安肯勉薄
利而來哉故變法而刻剥者適足使小商不來而
爲大商賣積貨也今必欲以術制商宜盡括居積
之物官爲賣而還之使其貨盡而後變法夫大小
商以利爲生一歲不營利則有遑遑之憂彼蓋不
能守積錢而閑吾得利雖薄猶將勉而來此變法
制商之術也夫欲誘商而通貨莫若與之共利此
術之上也欲制商使其不得不從莫若痛裁之使
無積貨此術之下也然此可制茶商耳若鹽者禁
益密則胥法愈多而刑繁若乃縣官自爲鬻市之
事此大商之不自爲臣謂行之難久者也誠能不
較銷銖而思遠大則積朽之物散而錢幣通可不
勞而用足也臣愚不足以知時事若夫堅守而扞
賊利則出而擾之凡小便宜願且委之邊將至於
積穀與錢通其漕運不二三歲而國力漸豐賊銳
漸挫而有隙可乘然後一舉而滅之此萬全之策

也願陛下以其小者而責將帥
謀其大計而行之則天下幸甚

辛卯慶曆元年春正月元昊遣人至延州議和范仲

淹以書諭之

元昊遣高延德還延州與范仲淹議和仲淹自為書遺元昊反復成諭書

曰正月日具位某謹脩誠意奉書於夏國大皇帝伏以先大王歸嚮朝廷心如金石我真宗皇帝命為同姓待以骨肉之親封為夏王獲此山河之大旌旗車服降天子一等恩信隆厚始終如一齊桓晉文之盛無以過此朝聘之使往來如家牛馬馳羊之產金銀繒帛之貨交受其利不可勝紀塞垣之下逾三十年有耕無戰禾黍雲合甲冑塵委養生葬死各終天年使蕃漢之民為堯舜之俗此真宗皇帝之至化亦先大王之功也自先大王薨背今皇震悼累日嘻吁遣使行吊轉之禮以大王嗣守

其國爵命崇重一如先大王昨者大王以本國衆
多之情推立大位誠不獲讓理有未安而遣行人
告於天子又遣行人歸其旌節朝廷中外莫不驚
憤請收行人戮於都市皇帝詔曰非不能以四海
之力支其一方念先帝歲寒之本意故夏王忠順
之大功其一朝之失而驟絕之乃不殺而還假有
本國諸蕃之長抗禮於大王而能含容之若此乎
省初念終天子何負於大王哉二年以來疆事紛
起耕者廢耒織者廢杼邊界蕭然豈獨漢民之勞
憊耶使戰守之人日夜射虎虢為吞噬死傷相枕
哭泣相聞仁人為之流涕智士為之扼腕天子遣
某經度西事而命之曰有征無戰不殺非辜王者
之兵也汝往欽哉某拜手稽首敢不夙夜於懷至
邊之日見諸將帥多務小功不為大畧甚未副天
子之意某與大王雖未嘗高會嚮者同事朝廷於
天子則父母也於大王則兄弟也豈有孝於父母

而欲害於兄弟哉可不為大王一二而陳之傳曰
名不正則言不順言不順則事不成大王世居西
土衣冠言語皆從本國之俗何獨名稱與中朝天
子侔擬名豈正而言豈順乎如衆情莫奪亦有漢
唐故事單于可汗皆本國極尊之稱具在方冊其
料大王必以契丹為比故自謂可行且契丹自石
晉朝有授立之功時已稱帝今大王世受天子建
國封王之恩如諸蕃中有叛朝廷者大王當為霸
主率諸侯以伐之則世世有功王王不絕乃欲擬
契丹之稱究其禮勢昭然不同徒使瘡痍萬民拒
朝廷之禮傷天地之仁易曰天地之大德曰生聖
人之大寶曰位何以守位曰仁是以天地養萬物
故其道不窮聖人養萬民故其位不傾又傳曰國
家以仁獲之以仁守之者百世昔在唐末天下恟
恟群雄咆哮日尋干戈血我生靈腥我天地痍我
禮樂絕我稼穡皇天震怒罰其不仁五代王侯屢

亡相續老氏曰樂殺人者不可加志於天下誠不
誣矣後唐顯宗祈於上天口願早生聖人以救天
下是年我太祖皇帝應祈而生及歷試諸難中
外忻戴不血一刃受禪於周廣南江南荆湖西川
有九江萬里之阻一舉而下豈非應天順人之至
乎由是罷諸侯之兵革五代之暴垂八十年天下
無禍亂之憂太宗皇帝聖文神武表正萬邦吳越
納疆并晉就縛真宗皇帝奉天體道清淨無爲與
契丹通好受先大王貢禮自茲四海熙然同春今
皇帝坐朝至晏從諫如流有忤雷霆雖死必赦故
四海之心望如父母此所謂以仁獲之以仁守之
百世之朝也某料大王諫議之初人有離間妄言
邊城無備土心不齊長驅而來所嚮必下今以強
人猛馬奔衝漢地二年於茲漢之兵民固有血戰
而死者無一城一將願歸大王者此可見聖宋仁
及天下邦本不搖之驗也與夫問者之說無乃異

乎今天下久平人人泰然不習戰鬪不熟紀律劉
平之徒忠敢而進不顧衆寡自取其困餘則或勝
或負殺傷俱多大王國入必以獲劉平爲賀昔鄭
人侵蔡獲司馬公子燮鄭人皆喜惟子產曰小國
無文治而有武功禍莫大焉而後鄭國之禍皆如
子產之言今邊士訓練漸精恩威以立有功必賞
敗事必誅將帥而下大知紀律莫不各思奮力効
命爭議進兵如其不然何時可了今招討司統兵
四十萬約五路入界著其律曰生降者賞殺降者
斬獲精強者賞害老幼婦女者斬遇堅必戰遇險
必奪可取則取可城則城縱未能入賀蘭之居彼
之兵民降者死者所失多矣是大王自禍其民官
軍之勢不獲而已也某又念皇帝有征無戰不殺
非辜之訓夙夜於懷雖師帥之行君命有所不受
柰何鋒刃之交相傷必衆且蕃兵戰死非有罪也
忠於大王耳漢兵戰死非有罪也忠於天子耳使

忠孝之人肝腦塗地積累怨魄爲妖爲災大王其
可忽諸朝廷以王者無外有生之民皆爲臣子何
蕃漢之限哉何勝負之言哉某與招討太尉夏公
經畧密學韓公嘗議其事莫若通問於大王計而
決之重人命也其美利甚衆大王如能以愛民爲
意禮下朝廷復其王爵承先大王之志天下孰不
稱其賢哉一也如衆多之情三讓不獲前所謂漢
唐故事如單于可汗之稱尚有可稽於本國語言
爲便復不失其尊大二也但臣貢上國存中外之
體不召天下之怨不速天下之兵使蕃漢邊人復
見康樂無死傷相枕哭泣相聞之醜三也又大王
之國府用或闕朝廷每歲必有物帛之厚賜爲大
王助四也又從來入貢使人指稱蕃吏之職以避
中朝之尊按漢諸侯王相皆出真拜又吳越王錢
氏有承制補官故事功高者受朝廷之命亦足隆
大王之體五也昨有邊臣上言乞招致蕃部首領

其亦已請罷大王告諭諸蕃首領不須去父母之
邦但回意中朝則太平之樂遐邇同知六也國家
以四海之廣豈無遺才有在大王之國者朝廷不
戮其家安全如故宜善事主以報國士之知惟同
心嚮順自不失其富貴而宗族之人必更優恤七
也又馬牛駝羊之產金銀繒帛之貨有無交易各
得其所八也大王從之則上下同其美利生民之
患幾乎息矣不從則上下失其美利生民之患何
特而息哉其今日之言非獨利於大王蓋以奉君
親之訓教生民之忠合天地之仁而已乎惟大王
擇焉不宣某再拜仲淹分析焚書奏曰臣仲淹奏
臣始聞虜有悔過之意故以書誘諭之會任福敗
虜勢益振故復書悖慢臣以為使朝廷見之而不
能討則辱在朝廷乃對官屬焚之使若朝廷初不
知者則辱在臣矣故不敢以聞也於是左正言孫
沔上言曰臣伏自前月以來聞中外言吳賊使高

廷德持書至延州有歸服朝廷之意范仲淹以書
諭之令去僭號方可納欵仍聞大臣頗有異議或
言忠義可賞者或言專命可戮者此數人皆平斷
天下事何是非智識其相遠倖如是又臣寮上言
者多相矛盾竊恐衆論紛撓以致惑亂視聽臣曉
夕思之未知孰得今偶有所見揣吳賊情僞之計
原邊臣得失之謀其理有三敢悉陳之萬一上合
聖聰亦愚人之極慮也一者以西陲蕃戶久來貿
鬻羊馬藥物歲數百萬至於米鹽飲食皆取資於
內地自吳賊背逆凡二年謹察邊方禁絕交易彼
又驅率鬪戰殺害父子量其蕃族怨望者衆矣今
忽來歸順者蓋知中國必未納其姦謀將給其族
類必曰我爲爾請和通其有無朝廷未允耳此將
以激怒其衆使爲邊患也二者近聞吳賊入寇涇
原騎十餘萬此亦慮我知其盡銳離於巢穴而以
別路攻其不備故使廷德僞來貢欵而緩我鄙延

一路之兵也三者范仲淹素負時望多士歸募今處邊任得將士心軍民受賜夷狄所聞故吳賊未測其寸謀因用延德爲反間以謀撓我師使疑而退黜之賊得其計矣臣又謂仲淹移書有利害者三焉一者賊請歸欵以我不許爲激衆之謀今仲淹答而許之則賊之策不得行此亦我權其利也二者賊以計緩我鄙延一路入攻之兵則我本無深討之策雖其詐來之意於邊境之慮亦無害也三者賊謀撓我師而仲淹答其書雖於軍政無損實亦自蹈危機今大臣果責其專命或言其可斬者若有奸謀深利此言使賊知之因致悖慢之言僞爲交結之意起市虎拾塵之說設並馬草具之事冀朝廷疑仲淹而明比有嫉害者從而媒孽之大則受誅滅之罪小則必竄逐其身使國家一朝失賢三軍無帥去邊地之長城開賊衆之大路此實可憂之甚也臣又見前歲王德用被罪廢黜本

其事發之因亦由臣寮以讖記之言形貌之肖章
奏交上何止於三使魯參被殺人之名而不得自
明也蓋德用至公之節得軍中之情有總統之望
爲遠人所知驩獲憂疑忽然廢棄使邊鄙無大將
而朝廷終不敢起德用豈非吳賊以密謀挾邪而
中害良善也今仲淹盡誠許國立義忘軀獨處遠
徼不顧危亡求之品流罕有倫擬在陛下聖哲推
其本心令得盡節則天下之幸也臣恐吳賊即設
姦計復荅其書矯陷仲淹暗合臣說則望陛下念
之以辨其詐使賢材不爲賊所欺逐則夷狄亡滅
立可俟矣或曰蕃寇小醜安有遠圖臣對曰預備
則無患過慮則少失若吳則實欲歸欵料之雖過
於事無損即如前歲賊使六十餘人峨冠變服託
以貢奉宣言僭稱之意時宰執謀議固無異術但
下詔削奪遣還而唯知制誥吳育上言以聖朝
太平旣久兵戰不習且因而撫之然後備邊

以議攻取為便當日柄臣皆誚其怯今二年連陷將帥覆傾兵衆豈復可以小寇待之然欲行吳育之策而未能也况仲淹以書移賊自是闔外事宜若昊賊因而歸順亦國家軍事之利於朝廷有何累哉今韓琦督戰無功敗軍殺將尚不欲黜削恐傷國體况仲淹以計策或有得失且於事未有大過豈宜輒加其罪諒陛下神幾聖斷盡在策中不待言而後知也臣與琦仲淹皆故舊深知今論事之際必盡公言決安危之計非愛憎之心也伏望陛下萬幾之暇乙夜詳覽幸甚

昊寇渭川任福與戰于好水川敗死韓琦行邊至高平元昊遣

象寇渭川琦乃趨鎮戎軍盡出其兵又募勇士萬八千人命環慶副總管任福將之以耿傳參軍事桑擇為先鋒朱觀武英王珪各以所部從福將行琦令福併兵自懷遠趨德勝砦至羊牧隆城出敵

之後諸砦相距才四十里道近糧便勢不可戰卽據險設伏要其歸路且曰苟遠節制有功亦斬福引輕騎趨懷遠擦龍川遇鎮戎巡檢常鼎劉肅與敵戰於張家堡南斬首數百賊棄馬羊佯北桑懌引騎趨之福踵其後薄暮屯好水川觀英屯籠絡川相距五里時已陷伏中矣芻餉不繼士馬乏食者三日元昊自將精兵十萬營於川口詰旦福與懌循川西行出六盤山下距羊牧隆城五里與夏軍遇懌於道傍得數銀泥合封襲謹密中有動躍聲疑莫敢發福至發之乃懸哨家鷓百餘自中起盤飛軍上於是夏兵四合懌馳犯其鋒福陳未成列賊縱鐵騎突之自辰至午陳動衆欲據勝地忽夏人陳中樹鮑老旗懌等莫測旣而旗左麾左伏起右麾右伏起自山背下擊士卒多墜覆崖塹懌肅戰死敵分兵斷其後任福力戰身被十餘矢揮四刃鐵簡挺身決問槍中左頰絕喉而死子懷亮

亦死之敵乃併兵攻觀英珪自羊牧隆城引屯兵
四千五百陳於觀軍之西趙津將瓦亭騎兵二千
繼至珪屢出畧陳陳堅不可破英被重傷官軍大
潰英津珪傳皆死士卒死者萬三百人惟觀以兵
千餘保民垣四向縱射會暮敵引去得還夏竦遣
人收散兵得琦檄於福衣帶間言罪不在琦琦亦
上章自劾猶奪一官知秦州先是范仲淹以先脩
諸寨上言曰臣近准陝西都招討使夏竦牒連到
朝廷指揮所有行軍所須令三司與韓琦等商量
疾速擘畫應副者臣今據鄜延路部管葛懷敏等
申所要軍須糧草共四狀繳連進呈臣相度前項
軍須糧草萬數不少必是一兩月辦集未得如今
辦搬運上項隨軍輜重糧草又須用廂軍二三萬
人必慮諸處廂軍數少起發不得或使駱駝騾子
一二萬頭卽山路險隘與兵馬三二百里轉難主
管若多差人夫卽恐有雨雪之變崎嶇暴露稍有

驚危便多逃散拋棄糧草為賊之資臣切見延州廢却承平南安長寧安遠寨門拷棹六寨之後自延州去賊界二程斤堠漸遠賊馬動息卒不可知又退却疆界賊轉深入又况延州東路廢却諸寨歸明弓箭手書皆流移着業未得又諸寨側近蕃部亦多驚起在近裏與漢戶雜居今春未有土田耕種若不脩復舊寨其蕃部既無活路恐糾率打劫近邊人户走入橫山賊界則其患不細臣又聞得橫山蕃部散入岩谷多設堡寨控扼險處入界之時兵少則難近多則難行假使主將智勇能奪其險彼則遠適我無所獲須過橫山後方到平沙却無族帳可取其討伐之計須是將帥出奇兵從天落則無非常之功似今重累而行實憂不利臣雖密奏朝廷留此一路未速討伐以示招來之意其邊界舊寨不可不謀乞作聖意指揮遣近上使命急至鄙延路令與臣催促諸將於二月半後出

兵萬餘人於廢寨中揀有利處先次脩復未湏大
段軍湏只以隨軍運糧兵夫因便興工候着次序
選驍捷將兵以守之既逼近蕃界彼或點集人馬
朝夕便知大至則閉壘以待隙小至則扼險以制
勝彼或放散人馬亦朝夕便知我則運致糧草以
實其備彼若歸順我已先復舊疆彼未歸順我已
壓於賊境橫山一帶在我目中強者可襲弱者思
附此亦禦邊之一事然脩復諸寨亦動軍民煩費
不少比之入界勞弊則有經久之利而無倉卒之
患且安存得東路熟戶蕃部并歸明弓箭手乞聖
慈裁酌轉運使龐籍亦上言曰臣伏以元昊父子
受國大恩一朝反叛今朝廷議討伐以正逆順實
合大義然此時興舉湏為萬全之策臣謂用兵之
道必先度我將既良我士既銳然後料敵之虛實
乘其罅隙而一舉滅之去秋鎮戎之戰依城壁據
根本以主待客而諸將或傷中而退或閉城不出

其士卒既無用命赴敵之心使賊殘毒人命剽劫財物從容進退如入無人之境可謂將不良士不知其虛實而便出界攻討此不可不爲朝廷憂也去春劉平等陷沒之後邊城人心日久惴慄幸卽時更張軍政比來士卒之氣漸振儻復一出不利則衆意愈懼必難再奮也況出界之後山川道路我軍素未經涉須以蕃部爲嚮道則其姦詐不可不防若至險隘之處部伍輜重尾首遙遠忽有伏兵鈔掠則必至潰散况黃德和敗手下潰兵不少至今招集未獲若數萬衆更潰而散不敢歸益生邊患不細臣切度廟謨以大兵屯聚已久上費國力下困主民欲決於攻取之計其餘將佐士卒未能如意或且爲歲月持守之備汰去冗兵只留精銳在邊數少則費用日寬兵精則足禦捍賊地所產之物嚴法以絕之使不得與邊人市易旣劫掠

無所得兼貨利無所通其勢必日感如更益練將
卒俟其罅隙可乘然後大舉庶幾有萬全之策也
安撫判官田况亦上言曰臣伏見昨夏竦等爲累
奉詔以師老費財慮生它變令早爲經畫以期平
定故韓琦等入奏畫攻守二策以稟聖筭其守策
最備可以施行不意朝廷便用攻策今一旦稟命
不敢持兩端非有夙定之謀必勝之勢倉卒牽合
殊無紀律昔繼遷屢擾邊陲太宗親部分諸將五
路進討或遇賊不擊或戰衄而還又嘗令白守榮
馬惟宗獲送糧餉於靈州諸將多違詔自奮蒲洛
之敗死者數萬人今將帥士卒素已懦怯未甚更
練又知韓琦尹洙所建之策恐未皇稟復臨事進
退有誤大舉請以事驗之且行師有期便須協力
今鄜延路總管司葛懷敏等須索百端料必不能
應副足以爲辭此不可者一也議者以謂賊嘗併
力而來我嘗分兵以禦衆寡不敵多貽敗衄今若

全師大舉必有成功此思之未熟爾夫三軍之命
係於將帥之材材有小大智有遠近以漢祖之善
將不若淮陰之益辦况庸人乎苟徒知大衆可以
威敵而不思將帥之材否此禍之大者也兩路之
入十餘萬人庸將驅之若爲舒卷賊若據險設伏
邀截衝擊首尾前後勢不相援則奔潰可憂今邊
臣所共獎者朱觀葛懷敏爾近於鎮戎軍界劉璠
定川等兩川西賊境中生聚牛羊皆遷徙遠去惟
空族帳守者二三百人輒來抗敵諸將奔走駭亂
幾不自危部隊前後不復可齊兵甲械用大爲攘
奪今兩路齊入併擊劇賊若不利則邊防莫守
別貽後患安危之計決於一舉此不可者二也自
西賊叛命以來雖屢乘機會然不敢深寇郡縣以
饗其款者非筭之少也蓋以中國之大賢俊之盛
甲兵之衆未易可測今我師深入若無成功大國
威靈益爲彼輕况或別墮奸計以至它虞此不可

者三也議者又云將師之間雖未足以下流勇進
或有其人自劉平石元孫陷沒士氣挫怯未易勇
奮今兵數雖多疲憊者衆以庸將驅怯兵入不測
之地獨近下使臣數輩干賞圖利欲邀奇功未見
其利此不可者四也議者又云非欲深絕沙磧以
窮祆巢但淺入山界以挫賊氣如襲白豹城之比
臣謂乘虛襲掠既不能破戎首拉兇黨但殘戮孱
弱以厚怨毒誠非王師吊伐招徠之體然事出無
策為彼之所為亦當雷震電逝往來輕速以掩其
不備今輿師十萬鼓行而西賊已巧為計謀盛設
隄備清野據險以待我師何襲挫之有此不可者
五也自其寇邊人皆知其誅賞明計數點今未有
間隙之可窺而暴為此舉計事者但欲決勝於一
戰幸其或有所成否則願自比王恢以待罪勇則
勇矣其如國事何此不可者六也昨延州范仲淹
奏乞朝廷開包荒之量存此一路令諸將勒兵嚴

備賊至則擊但未行討伐容示以恩意歲時存問
或可招納令尹洙到延州商量仲淹堅執前奏未
肯出師若使涇原一路獨入則孤軍進退憂患不
淺今諸處採到事宜多言吳賊埃我師諸路入界
則併兵一處以拒敵招徠人杜文廣所說一同此
正陷賊計中此不可者七也以臣所見夏竦韓琦
尹洙同獻此策今若奏乞中罷則是前後自相違
異殊無定筭欲果決進討則又仲淹執議不同或
失期會乞召兩府大臣定議但令嚴設邊備若更
有侵掠則須出兵邀擊以推賊勢如復怯懦容賊
殺掠當以軍法從事或探得賊界謹自守備不必
先有輕舉恐落奸便如此則全威制勝有功而無
患也然自議攻討以來賊中呼集醜類廣為防守
遷移勞擾未嘗少安至今却有通欵意亦不為無
益至於驢畜軍需之物虛煩調發却欲罷兵亦是
事之小者臨時分擘處置亦不為難所願者安危

大計爾乞密降
朝旨下總管司
分陝西為四路以韓琦王公范仲

淹龐籍兼經畧安撫招討使
分秦鳳涇原環慶鄜

知秦州公知渭州仲淹知慶州籍知延州詔分領
之張方平言涇原最當賊衝王公未憊人望不當

與琦等同列不報琦上言請於鄜慶渭三州各益
兵三萬選將訓練預分部曲遠斥堠來則併力擊

之或破其和市招其種落延州自元昊反城皆焚
掠殆盡籍至稍葺治之命部將狄青等襲取故地

多築城砦延民以安初元昊陰約環慶酋長六百
人為鄉導仲淹至部即奏行邊犒賞諸羌閱其人

馬立條約羌人親愛之乎為龍圖老子以慶州西
比馬鋪砦在賊腹中欲城之密遣其子純佑與蕃

將趙明先據其地引兵隨之諸將不知所向行至
柔遠板築皆具旬日城成即大順城也賊覺以三

萬騎來戰佯北仲淹成勿追已而果有伏兵勒還
鄜延路都鈐轄知延州張亢上所疑十事曰臣伏
以太平日久人不知兵元昊反逆以來民力凋弊
而邊機軍政措置未得其宜今輕陳臣之所疑者
十事臣切謂王師每出不利其非節制不立號令
不明訓練不至器械不精或中賊之詭計或自我
之貪功或左右前後自不相救或進退出入未知
其便或兵多而不能用兵少而不能避或為持權
者之所逼或因懦將之所牽或人馬困饑而不能
奮或山川阻險而不能通此皆將不知兵之弊也
未聞深究致敗之由而處置之雖徒益兵馬亦未
見必勝之理臣之所疑者一也去春賊至延州諸
路發援兵而河東秦鳳各踰千里涇原環慶不下
十程去秋賊出鎮戎又遠自鄜延發兵且千里遠
關豈能施勇如賊已退乃是空勞師徒異時更寇
別路必來如此不戰而自憊臣之所疑者二也今

鄜延副總管許懷德兼環慶軍馬環慶副總管王仲復兼鄜延其涇原路副總管等亦兼隣路雖令互相策應然環州至延州十四五程直路亦不下十驛涇原至秦州又遠於此若一處有事自此發兵赴援而山路險惡人馬已困欲責其功何可得也臣之所疑者三也四路軍馬各不下五六萬朝廷盡力供億而邊臣但言兵少每路欲更增十萬人亦未見成功之効且兵無節制一弊也無奇正二弊也無應援三弊也主將不一四弊也分兵勢弱五弊也有此五弊如駘市人而戰雖有百萬亦無益於事臣之所疑者四也古之教習須二年然後功成今之用兵已三年將帥之中孰賢孰愚攻守之術孰得孰失累年敗衄而居邊要者未知有何謀設更數年或未罷兵國用民力何以克堪若因之以饑饉加之以師旅安危之策未知如何臣之所疑者五也今言邊事者甚衆朝廷或卽奏

可使定奪以聞或劄下逐處或不令下司前條方
逐施行後令復即衝改胥吏有抄錄之勞官員無
者詳之暇邊防軍政一無定制臣之所疑者六也
夏竦陳執中皆朝廷大臣凡有邊事皆付之不疑
今但主文書守詔令每有宣命則翻錄行下如諸
處申稟則令候朝廷指揮如此則何必以大臣主
事臣之所疑者七也前河北用兵減冗官以省費
今陝西日以增員且如制置青白鹽使副招撫蕃
落使臣等十餘員所占兵士千餘人請給歲約數
萬緡復有都大提舉鋪鋪器甲之類又諸州一例
招到新兵克敵制勝保捷廣銳武毅等指揮久未
教閱但費軍廩無益邊備臣之所疑者八也國家
竭財用以贍軍士有手藝者管兵之官每一指揮
抽占三人一如延州諸將不出即有兵二萬餘五
千守城之外其餘正兵萬五千若有事宜三日內
不能圍集况四十里外便是賊境一有奔衝緩急

何以支梧臣之所疑者九也陝西教習鄉兵共十餘萬人其中無賴之輩名桂尺籍心薄田夫豈無姦盜雜於其中苟無措置它日為患不細臣之所疑者十也乞暫許臣赴闕面陳利害如臣狂率不可用即行降黜

壬午二年秋九月元昊寇鎮戎軍副總管葛懷敏會

兵禦之敗死元昊遂大掠渭州

種世衡遣王嵩至夏以書物疑問剛

浪凌高被囚剛浪凌遣李文貴詣世衡請和龐籍曰此詐也元昊果大舉入寇攻鎮戎軍王公使懷敏督兵禦之分諸將為四路趨定州砦賊毀橋斷其歸路四面圍之懷敏突圍走兵大潰懷敏至長城濠路已斷遂受將校十四人死焉餘軍九千四百馬六百皆為敵所得元昊乘勝直抵渭川焚蕩

盧舍屠掠民畜自涇外以東皆閉壘自守
范仲淹自將慶州蕃漢兵援之元昊乃還

癸未三年春正月元昊上書請和

西園用兵日久帝
厭之會契丹使

言元昊欲歸欵乃密詔龐籍招納之籍遣李文貴
還以通意元昊大喜亟出王嵩厚禮之使與文貴
以剛浪陵書至延州議和然猶倔强不肯削僭號
且云如日方中止可順天而行安可逆天東下籍
以其言未服乃令自請而詔籍復書許之元昊知
朝廷許和乃遣其六宅使賀從勗與文貴至延州
上書自稱男邦泥定國兀卒上書父大宋皇帝更
名曩霄而不稱臣兀卒即吾祖也如可汗號籍言
名體未正不敢以聞從勗曰子事父猶臣事君也
若得至京師天子不許更歸議之籍送至闕下因
陳便宜言羌久不通和市國人愁怨今詞理寢順
必有改事中國之心請遣使諭之詔曰昨以夏國

累年以來數興兵甲侵犯疆陲驚擾人民誘迫熟
戶去秋乃復直叩大順園迫城寨焚燒村落抗敵
官軍邊奏屢聞人情共奮群臣皆謂夏國已違誓
詔請行拒絕先皇帝務存含恕且詰端由廢觀逆
順之情以決衆多之論達此遜章之稟命已悲仙
馭之上賓朕纂極云初包荒在念仰循先志俯諒
乃誠既自肖於前幸復顛堅於永好為奏封所叙
忠信無渝則恩禮所加歲時如舊安民保福不亦
休哉
夏四月遣使如夏州
賀從勛至京師帝用龐籍
言命著作佐郎邵良佐更
往議之許封冊元昊為夏國主歲賜絹十萬匹茶
三萬斤邵良佐至夏州元昊亦遣如定聿拾張延
壽等來議和及歲弊朝議廣情翻覆不常邊備不
宜遽弛御史中丞賈昌朝遂以馭將言於上曰臣
昌朝言太祖收方鎮之權以為萬世利及大宗
特將帥率多舊人猶能仗威靈所向有功近歲西

差之叛驟擇將領士不練習以屢易之將取不練之士故戰必敗此削方鎮太過之弊也况今武臣多親舊恩倖出即為將素不知兵一旦付以千萬人之命是驅之死地矣此用親舊恩倖之弊也請自今方鎮守臣無數更易刺史以上宜慎所授以待有功且命將之時去疑貳推恩惠務責以大效使一切便宜從事庶得馭將之道

甲申四年春三月契丹党項諸部叛附于夏

元昊侵党項契

丹遣使讓之元昊不聽党項等部及山西部族節度使屈烈皆叛契丹降於元昊

夏四月

契丹伐党項夏入救之元昊復遣使來上表

元昊

遣使上誓表言两失和好遂歷七年立誓自今願藏盟府其前日所掠將校民戶各不復還自此有

邊人逃亡亦毋得襲逐臣近以本國城砦其拷栳
鑊刀南安承平故也及他邊境蕃漢所居乞為畫
中界於內聽築城堡九歲賜銀綺絹茶二十五萬
五千乞如常數臣不復以他相下乞頒誓詔蓋欲
世世遵守未以為好儻君親之義不存或臣子之
心渝變當使宗祀不求子孫罹殃帝遣使賜元昊
詔曰朕臨制四海廓地萬里西夏之士世以為昨
今乃納忠誨咎表於信誓質之日月要之鬼神及
諸子孫無有渝變申復懇至朕甚嘉之俯聞來誓一皆如約

秋九月契丹伐夏

冬十月夏人誘而敗之契丹及夏平

契丹主宗貞親將騎兵十

萬出金肅城遣弟重元將騎七千出南路樞密使
蕭惠將兵六萬出北路三路濟河長驅入夏境四
百里不見敵據德勝寺南壁以待惠與元昊戰於
賀蘭山北敗之元昊請和退師十里請收叛黨以

獻且進方物契丹進軍河曲元昊親率光項三部
以待罪契丹命蕭革詰其納叛背盟之故賜之酒
許其自新惠不可契丹主猶豫未決元昊以未得
成言又退師三十里以候凡三退將百里每退必
赍其地契丹馬無所食因許和元昊乃還延以老
之度其馬饑士疲因縱兵急攻惠營敗之乘勝攻
南壁契丹主大敗從數騎走得免元昊入樞密使
蕭孝友若執駙馬蕭胡覩以去已而遣使歸其先
所俘獲契丹亦遣所留夏使還之契丹主遂引兵還
十二月冊元昊為夏國主
余靖使契丹還知契丹已與夏和帝乃遣尚書
員外郎張子奭充冊禮使冊元昊為夏國主仍
賜對衣黃金帶銀鞍勒馬銀二萬兩絹二萬匹茶
三萬斤冊以漆書竹簡籍以錦金塗銀印文曰夏
國主印約稱臣奉正朔改賜敕書為詔而不名許
自置官屬使至京就驛賀實宴坐朵殿使至其國

相見用賓主禮置榷場於保安軍及高平峇第不通青鹽命國子博士高良夫等會夏人畫疆界然朝使往者止留館宥州終不復至興靈而元昊帝其國中自若也先是樞密副使韓琦上言曰臣伏見朝廷已封冊夏國又契丹以西征回來告當此之時若便爲太平無事則後必有大憂者三若以前日之患慮及經遠則後必有大利者一請畧言之自羌人盜邊以來於今七年小入大至未嘗挫其鋒今乘累勝之氣而與朝廷講利者得非凡軍興之物悉取其國人而所獲不償所費又以絕在邊和市上下困乏暫就稱臣之虛名而歲邀二十五萬之厚賂非爲得計邪且契丹勢素強而夏人尚敢與之抗衡若使其歲享金繒及和币之利國內充實一旦我之邊備稍弛則必有大窺圖關輔之心此臣所謂後必有大憂者一也契丹昨以羌人誘致邊民遽往討伐旣不得志而還見朝廷封

冊曩霄其心必固不樂近謀者傳契丹國人語云
往西河趨沙漠中所得者唯牛羊耳若議南牧則
子女玉帛不勝其有臣恐契丹異日或更有邀求
或請絕西人之和以墮盟誓且河北兵驕不練忽
爾奔衝則必震動京師此臣所謂後必有大憂者
二也又昔石晉假契丹力以得天下歲遺繒帛三
十萬今朝廷歲遺契丹五十萬夏國二十五萬使
二虜日以富強而國家取之於民日以朘削不幸
數乘水旱之災則患生腹心不獨在虜此臣所謂
後必有大憂者三也昨契丹自恃強盛意欲并吞
夏人倉卒興師反成敗如犬羊之性切於復讎必
恐自此交兵未已且夷狄相攻者中國之利此誠
朝廷養謀待變之時也若能內葺紀綱外練將卒
休息民力蓄歛財用以坐待二虜之弊則幽薊靈
夏之地一舉而可圖振耀威靈彈壓夷夏豈不休
哉此臣所謂後必有大利者一也臣願陛下深思

去大憂而取大利
則為天下之福

戊子八年春閏正月夏元昊卒年四十六子諒祚方

也養於母族訛龐訛龐因與三大將分治國政改元延嗣寧國尊沒藏氏為皇太后李燾曰元昊

初娶遇乞從女野利氏生寧令哥特爰之以為太子既而欲為寧令哥納沒移氏為妻見其美自取

之寧令哥憤殺元昊不死刺其鼻而去匿訛龐家為訛龐所殺元昊鼻創死王稱曰自德明欽察

西鄙息有矣元昊疆梁兇悍乃謀僭尊號以天下之力臨區區一方然未嘗少挫及敗於女色禍發

其子彼能叛君而子夏四月冊諒祚為夏國主遣能弒父此天道也

使來告哀朝廷及契冊皆遣使慰奠議者請因諒祚幼弱毋族專國以節鉞啖其三大將使各有部

分以披其勢陝西安撫使程琳曰幸人之喪非所以柔遠人不如因而撫之帝乃遣使冊諫祚為夏國主議者深惜朝廷之失機會

己巳皇佑元年秋九月契丹伐夏夏入襲敗之

契丹北院

樞密使蕭惠師帥自河南進以伐夏戰艦糧艘綿亘數百里既入敵境偵候不遠鎧甲載於車軍士不得乘馬諸將請備不虞惠曰諫祚必自迎車駕何暇及我契丹主既還惠師尚進未立營柵夏兵奄至惠與麾下不及甲而走幾不得脫士卒死傷者不可勝計冬十月契丹復伐夏獲諫祚之母于賀蘭以歸

庚寅二年春二月夏侵契丹 三月契丹伐夏 冬

十月夏請平於契丹契丹不許夏兩遣使於契丹乞依舊稱蕃契丹

主遣北院都監蕭文結等使夏索党項叛戶夏表契丹乞代党項權進駝馬等物求唐隆鎮及罷所

連城邑契丹主不許安置所獲曩霄妻於薊州

癸巳五年秋九月夏及契丹平

丙午英宗皇帝治平三年夏四月夏人寇邊環慶經

畧使蔡挺擊走之先是夏主諒祚遣吳宗來賀即位宗語不遜詔諒祚懲約宗詔

曰朕嗣守丕圖日新庶政方推大信以協萬邦思與蕃屏之臣未遵帶礪之約矧勤王而述職固非世以惟誠而近年以來將命之使或不體朝廷之意罔循規矩之常多於臨時率爾改作既官司之

有守致事體以難從且下修奉上之儀本期勅順而君有錫臣之寵所以隆恩豈宜一介於其間輒以多端而生事在國家之撫御固廓爾以無疑想忠孝之傾輸亦豈欲其如此故特申於旨諭諒深認於眷懷今後所遣使人更宜精擇不令妄舉以紊彝章所有押賜押伴使臣等亦已嚴行戒勵苟有遠越必寘典刑載惟信誓之文炳若丹青之事皆可守言責弗違毋開問隙之萌庶敦悠久之好諒祚不奉詔而出兵秦鳳涇原抄熟戶擾邊塞殺掠人畜以萬計遂寇大順城環慶經畧使蔡挺使蕃官趙明擊之諒祚裹銀甲氈帽督戰挺先遣強弩列壕外注矢下射諒祚中流矢遁去徒寇柔遠挺又使副總管張玉以三千人夜出擾營賊驚潰退屯金湯

丁未四年冬十月青澗守將种諤襲虜夏監軍嵬名

山遂復綏州鬼名山部落在故綏州名山弟夷山請降於知青澗城种諤使人因夷

山以誘名山路以金孟名山小吏李文喜受之陰許歸款而名山未之知也諤即以聞且欲因取可

南地知延州陸詵言情偽未可知戒諤勿妄動諤持之力不待命悉起所部兵進圍名山帳名山不

得已舉衆從諤而南得首領三百九萬五十一月千兵萬人遂城其地夏人來爭諤擊敗之

夏人誘殺知保安軍楊定等詔韓琦經畧陝西种諤

既受鬼名山降諤詐乃詐為會議誘知保安軍楊定等殺之朝議欲棄綏誅諤陝西宣撫主管機宜

文字趙離言虜既殺王官而又棄綏不守示弱已甚又移書執政請存綏以張兵勢規度大理河川

達堡畫稼穡之地三十里以處降者不從乃命琦判永興軍經畧陝西琦具論綏不可棄卒存綏州

貶諤四官
安置隨州

十二月夏主諒祚卒子秉常立

諒祚錮送殺揚

定守領李崇貴韓道善既而諒祚卒年才二十
子秉常立遣其臣薛宗道等來告哀帝問殺揚定
事宗道言殺人者已執送之矣及崇貴等至言定
奉使諒祚嘗拜稱臣且許以歸沿邊熟戶諒祚遣
之寶劍及金銀物初定歸時上其實劍而匿其金
銀言諒祚可刺帝喜遂擢知保安軍既而夏人失
綏州以爲定責已故殺之至是事露帝薄責崇貴
等而削定官沒其田宅萬計遣劉航冊秉常爲夏
國主夏改元乾道東常方七歲其策文曰維熙寧
二年歲次己酉三月戊辰朔十四日辛巳皇帝若
曰於戲昔堯合萬邦而民風和周建列上而王業
懋若古申命蓋國家之成法也咨爾秉常迪性純
一飭躬靖虔生稟山川之靈舊傳弓鉞之賜撫有
西夏尊於本朝知事君必盡其節知守國當保其

衆乃內發誠素外孚誓言質之天地而不欺要之日月而不昧朕用稽酌故典表顯徵實錫爾以茅土之封不為不寵加爾以車服之數不為不榮洎辰既良備物既渥誕舉玉冊以華一方今遣朝奉郎守尚書司封郎中上輕車都尉賜紫金魚袋劉航文思副使銀青光祿大夫檢校太子賓客兼御史大夫騎都尉彭城縣開國伯食邑七百戶劉愆持節冊命爾為夏國主為宋藩輔夫履謙順者靡不膺長福懷驕肆者靡不蹈後虞率身和民時乃之績往欽哉祇予一人之彛訓不可慎歟

己酉神宗皇帝熙寧二年春二月夏人寇秦州夏人寇秦

州陷劉溝堡殺守將夏主秉常既冬十月城綏州寇秦州復上

范愿死者不可勝計誓表請納安遠塞門二砦以乞綏州邠延宣撫郭達上言曰此正商於六百里之策也非先交二砦

不可與綏朝議以為然賜以誓詔夏主遣其臣周
萌訛來言欲先得綏達境城綏州不以易二砦改
名綏德城

庚戌三年秋八月夏人寇環慶州以韓絳為陝西宣

撫使先是夏人築閣訛堡知慶州李復圭合蕃漢
兵三千遣裨將李信劉甫禦之信等大敗而

還復圭懼欲自解執信等斬之復出追夏人老幼
二百以功告捷至是夏人大舉入環慶攻大順柔
遠城砦兵多者號二十萬少者不下一二萬屯於
榆林游騎到慶州城下九日乃退鈴轄郭慶等數
人死馬韓絳請行邊乃以絳為陝西
宣撫使授以空名告敕得自除吏

辛亥四年春二月韓絳使种諤襲夏人敗之遂城囉

兀韓絳開幕府於延安復以种諤為都延鈴轄諤謀取橫山乃帥師襲夏人於囉兀大敗之因以

兵三萬城焉三月夏人陷撫寧諸城諤進築永樂賞逋三皆分遣都監趙

璩燕達築撫寧故城若夏人來攻順寧若遂圍撫寧折繼世等擁兵駐細浮圖去撫寧咫尺囉兀兵

勢尚完諤在綏德聞夏人至茫然失措欲作書召燕達戰悖不能下筆涕泗而已由是新築諸堡悉

陷將士沒者千餘人詔棄囉兀城治諤罪責授汝州團練副使潭州安置絳罷知鄧州

辛酉元豐四年夏五月夏人幽其主秉常秋七月詔

宦者李憲備陝西河東五路之師討之知慶州俞充言謀報

云夏將李清本秦人說秉常以河南地來歸秉常毋梁氏知之遂誅清奪秉常政而幽之宜與師問

罪帝然之遂詔熙河經制李憲等大舉征夏而召
廊延副總管种諤入對諤至大言曰夏國無人秉
常孺子往持其臂以來爾帝壯之乃決意西伐孫
固吕公著皆極言不可帝不聽竟命李憲出熙河
种諤出廊延高遵裕出環慶劉昌祚出涇原王中
正出河東分道並進又詔吐蕃首領董氍集兵會
伐 九月李憲復蘭州憲總熙秦七軍及董氍兵三萬敗夏人於西市新城復襲

女避谷破之遂復古蘭 种諤克米脂城諤率廊延兵出綏德
州城之請建為帥府 以攻米脂夏人八萬來救諤與
戰于無定川敗之遂克米脂 冬十月高遵裕復

清遠軍 内使王中正以河東兵入宥州中正率兵出麟

州渡無定河循水北行地皆沙濕土馬多陷沒糗糧不能繼又耻無功遂入於宥州時夏人棄城走

河北城中餘民百餘家中正
遂屠之掠其牛馬以充食
十一月高遵裕等兵

潰李憲不至靈州而還
劉昌祚率蕃漢兵五萬受
遵裕節制令兩路合軍以

進既入境而慶兵不至昌祚次磨
萬柅險大破之遂薄靈州城兵幾
入門遵裕候其

功馳使止之昌祚按甲不敢進
遵裕至圍城十八
日不能下夏人決黃河七級渠以灌營復鈔絕餉

道士卒多凍弱死遂潰而還餘軍
緣萬三千而已
夏人躡之復敗昌祚亦還涇原種諤留千人守米

脂而自率大衆進攻銀石夏州
遂破石堡城進至
夏州駐軍索家平會大校劉歸仁衆潰而軍食又

乏復值大雪乃引還死者不可勝
計入塞者僅二
萬人王中正自有州行至柰王井糧盡七卒死者

二萬人亦引退初詔憲帥五路兵
直趨興靈憲總
師東上營於天都山下焚夏之南
牟內殿并其館

庫追襲其統軍仁多陵丁敗之次於葫蘆河遂班師時五路兵皆至靈州獨憲不至

壬戌五年春正月貶高遵裕等官以李憲為涇原經

畧安撫制置使

初夏人聞朝廷大舉毋梁氏問策於廷諸將少者盡請戰一老將獨

曰但堅壁清野縱其深入聚勁兵於靈夏而遣輕騎抄絕其餽運可不戰而困也梁氏從之故士卒

無功而還帝論敗師罪高遵裕責授郢州團練副使本州安置種諤王中正劉昌祚並降官孫固以

憲後期當斬帝以憲有功釋弗誅憲復上再舉秋之策詔以為涇原經畧安撫制置使知蘭州

九月夏人陷求樂徐禧等敗死

仲諤之議城銀州也帝以為然遣給

事中徐禧內侍李舜舉往鄜延議之禧至上言求樂之形勢險扼請先城之種諤不可帝從禧議

自率諸將往禁十四日而成禧等退還米脂以兵
萬人屬曲珍守之禧去九日夏人以數千騎來攻
曲珍使報禧禧遂與李舜舉李稷往援之留沈括
守米脂比祗未樂夏人傾國而至大將高永能請
及其米陳擊之僖曰爾何知王師不鼓不成列執
刀自率士卒拒戰夏人進薄城下將士皆有懼色
珍曰今衆心已槌不可以戰請收兵入城禧曰君
爲大將柰何先自退耶乃以七萬人陳於城下夏
人縱鐵騎渡河珍曰此鐵鷄子軍也當其半濟擊
之得地不可當也僖不從鐵騎旣濟震蕩衝突大
衆繼之珍銳卒敗奔還蹂後陳夏人乘之珍衆大
潰珍收餘衆入城夏人圍之士卒晝夜血戰城中
乏水掘井不及泉渴死者十六七括與李憲援兵
及餽餉皆爲夏人所隔种諤怨禧亦不遣救師城
中大急會夜半大雨夏人環城急攻城遂陷禧舜
舉稷未能皆遇害惟珍裸跣走免將校死者數百

人喪士卒役夫二十餘萬夏人耀兵米脂城下而還自熙寧以來用兵官軍熟羌議保死者六十萬人錢穀銀絹不可勝計事聞帝臨朝痛悼為之不食贈禧等官第貶括隨州安置降珍為皇城使

癸亥六年春二月夏人寇蘭州夏人數十萬圍蘭州已奪兩關門鈴轄王

文郁集死士七百餘人緹城擊走之未幾夏人復分道入寇亦多為諸路所敗劉摯言李憲避興靈

會師之期頓兵以城蘭州遺患至今詔貶憲為熙河安撫經畧都總管

夏閏六月夏

人復來脩貢夏人亦弊於兵西南都統昂星崑名濟移書涇原劉昌祚乞通和好如初

昌祚以聞帝諭昌祚答之及入寇屢敗國用益竭乃遣謨箇咩迷乞遇來上表帝許之復詔陝西河

東經畧司其新復城砦徵循毋出二里夏之歲賜悉如其舊未幾夏主表乞侵疆帝不許乃答以

詔曰項以權強敢行廢辱朕用震驚令邊臣往問
匿而不報王師徂征蓋討有罪今遣使造庭辭禮
恭順仍聞國政悉復故常益用嘉納
已戒邊吏毋輒出兵爾亦慎守先盟

甲子七年春正月夏人大舉寇蘭州

初李憲以夏人數至蘭州河外

而翔翔不進意必大舉乃增城守之備至是果大
舉入寇步騎號八十萬圍蘭州意在必取督衆急
攻矢如雨雹雲梯革洞百道並
進凡十晝夜不克糧盡引去

丙寅哲宗皇帝元佑元年秋七月夏主秉常卒子乾

順立

帝初即位秉常遣訛囉聿求蘭州米脂等五
砦司馬光欲帝許之光又欲併秦熙河邢恕

亦言當訪之邊人光乃召前通判河州孫路問之
路披圖示不可相光乃止會秉常卒遣使來告哀

詔自元豐四年用兵所得城砦待歸我求樂陷執
民當畫以給還遂遣穆衍往吊祭秉常時年三十
六矣尋遣使封乾順為夏國主
夏改元天儀治平乾順方三歲

庚午五年春二月夏人來歸求樂之俘詔以米脂等

四砦畀之

夏人來歸求樂所獲吏士百四十九人
遂詔以米脂葭蘆浮圖安疆四砦還之

夏得地
益驕

丙子紹聖三年冬十月夏人寇廊延陷金明砦

夏人自得

四砦連歲以畫地未定侵擾且遣使欲以蘭州一
境易塞門二砦朝廷不許夏主乾順乃奉其母率
衆五十萬大入廊延自長城一日馳至金明列營
環城乾順母子親督桴鼓縱騎四掠邊將悉兵掩

擊不退金明遂陷守兵三千八百惟五人得脫城中糧五萬石草千萬束皆盡將官張與戰死初帝聞夏寇泰結笑曰五十萬衆深入吾境不過十日勝不過一二若湏去已而果破金明引還

戊寅元符元年冬十月夏人寇平夏城知渭州章綽

大敗之獲其將寇名阿埋

綽在涇原日久嘗言夏

不得休息宜稍取其疆土如古削地之制以固吾圍然後諸路出兵擇要害勢將自感矣章惇與綽同宗言多見采由是劍州一城若九屢敗夏人及平夏被圍綽禦之獲其將寇名阿埋西壽監軍妹勒都通斬獲甚衆夏人震駭不復振矣捷至帝御紫宸殿受賀

己卯二年春三月遼人為夏請和

夏求援於遼遼主遣簽書樞密院事

蕭德崇來為夏人議和仍獻王帶詔郭知章報之
復書謂若果出至誠深悔謝罪當徐度所宜開以
自新路冬十一月許夏人通好先是夏蘭會正鈐轄

既而知環州种朴微赤羊川獲賞羅訛乞家屬孳
蓄及夏人追戰又擒其監軍訛勃羅夏主悔懼遣

其臣令能嵬名濟等來謝罪且進誓表曰臣國久
不幸時多遇凶兩經母黨之擅權累為奸臣之竊

命頻生邊患增怒上心舉端既深理訥難達幸凶
黨伏誅雅躬反正選馳懇奏陳前咎之所歸乞紹

先盟果淵衷之俯納故班詔而申諭獲貢誓以輸
誠謹當飭疆吏而求絕爭端戒國人而常遵聖化

遠約則凶咎再降背盟則基緒非延約束事條恭
依處分於是答以詔曰爾以凶黨造謀數干邊吏

而能悔過請命祈紹先盟念彼種人均吾赤子措
之安靜乃副朕心嘉爾自新俯從厥念爾毋爽約

朕不食言自今已往歲賜如舊自是西陲民少安矣

乙酉徽宗皇帝崇寧四年春三月夏人寇涇原遂誘

吐蕃圍宣威城執知鄯州高臬年殺之

蔡京使王原招誘夏

卓羅右廂監軍仁多保忠愈急朝廷用京計又命西邊能招致夏人者毋問首從賞同斬級厚又令

陶節夫在延安大加招誘夏主遣使異請皆拒之夏人遂入鎮戎畧數萬口與羌酋溪賒羅撒合兵

逼宣威城知鄯州高臬年出禦之為羌所執遂殺之探其心肝食焉已而羌衆復叛帝親書五路將

師劉仲武等十八人姓名敕御史侯蒙往洽之獄既具蒙奏曰臣蒙言漢武帝殺王恢不如秦穆公

赦孟明子玉繼而晉侯喜孔明亡而蜀國輕今西賊殺吾一都護而使十八將由之以死是自戕其

肢體也於是皆免唯王厚
坐逗遛降授郢州防禦使

乙未政和五年春正月熙河將劉法敗夏人於古骨

龍童貫遺熙河經畧使劉法將步騎十五萬出遼
州秦鳳經畧使劉仲武將兵五萬出會州貫以

中軍駐蘭州為兩路聲援仲武至清水河築城屯
守而還法與夏右廂軍戰於古骨龍大敗之斬首

三千餘 秋九月王厚等攻夏臧底河城敗績夏人遂

大掠蕭關厚與劉仲武合涇原環慶秦鳳之師攻
夏臧底河城敗績死者十四五秦鳳第

二將全軍萬人皆沒厚懼重賂童貫
匿不以聞未幾夏人大掠蕭關而去

丙申六年春正月劉法攻夏仁多泉城屠之
童貫使
劉法劉

仲武合熙秦之師十萬攻夏仁多泉城渭州將种城
中力守援不至乃降法受而屠之

師道克夏臧底河城師道世衡之孫也冬十月夏人寇涇

原屠靖夏城夏大舉攻涇原靖夏城時久無雪夏先使數萬騎繞城踐塵漲天乃潛穿

壕為地道入城中城遂陷屠之而去

己亥宣和元年春三月劉法及夏人戰於統安城敗

走夏人追殺之童貫使劉法取朔方法不欲行強遣之乃引兵三萬出統安城遇夏

主第察哥率步騎為三陣以當法前軍而別遣精騎登山出其後大戰移七時兵饑馬渴死者甚衆

法乘夜遁比明走七十里至蓋朱峴守兵追之斬首而去貫隱其敗而以捷聞察哥遂乘勝圍震武

城將陷察哥曰勿破此城
留作南朝病塊乃自引去

壬寅四年夏六月夏人救遼金襲敗之於宜水金之擊遼

也夏主使李良輔將兵三萬救遼金將幹魯婁室
敗之於宜水追至野谷澗水暴至夏人漂沒者不

計可勝

癸卯五年夏五月遼主延禧奔夏遼主青塚之敗也走雲內夏主乾順

遣使請臨其國遼主從之中軍都統蕭特烈等切
諫不聽遂渡河次於金蕭軍北遣使冊乾順為夏

國皇帝人情惶懼特烈陰與耶律元宜共劫遼金
主第二子梁王雅里走西北部三日遼立為帝

遣使如夏幹擒不趨天德聞夏迎護遼主已渡河
乃遣書於夏使執送遼主且許割地

甲辰六年春正月夏稱蕃於金金以邊地畀之夏得金書

遣把里公亮奉誓表請以事遼之禮稱蕃於金表曰臣乾順言今月十五日西南西北兩路都統遣左諫議大夫王介儒等齎奉宣若夏國進悔前非捕送遼主依遼國舊制及賜誓詔有或不虞交相揀援者臣與遼國世通姻契各係蕃臣輒為援以啓端魯犯威而結釁既遠天之咎果催敗績之憂蒙降德音以寬前罪仍錫土地用廣維蕃載惟含垢之恩常切戴天之望自今以後凡歲時朝賀進貢表章使人徃復等事一切求依臣事遼舊例其昏主今不在臣竟至如犇竄到此不復存泊即當執馱若大朝知其所在以兵追捕無敢為地及依前援助其或徵兵即當依應至於殊方異域朝觀天闕合經當國道途亦不敢阻截以上所叙數事臣誓固此誠傳似不變苟或有渝天地監察

神明殛之禍及子孫不克享國於是粘沒喝承制
割下寨以北陰山以南乙室耶刺部吐祿濼西之
地與之誓詔曰維天會二年歲次甲辰閏三月戊
寅朔皇帝賜誓詔於夏國王乾順先皇帝誕膺駿
命肇啓鳴國而卿國據夏臺竟連遼右以効力於
昏主致結繫於王師先皇帝以謂忠於所事務施
恩而釋過迨眇躬之纂紹仰遺訓以遵行卿乃深
念前非樂從內附飭使輶而克貢効臣節以稱蕃
載賜寵充用彰復好所有割賜土地使聘禮節相
為援助等事恭依先朝制詔其依微兵所請於戲
三辰在上朕豈失盟苟或變渝
亦如卿誓遠垂戒諭毋替厥誠

丙午欽宗皇帝靖康元年夏四月夏人陷天德雲內

諸城金人襲取之

先是粘沒喝遣撒梅使夏許割
天德武州等八館之地約攻麟

州夏人遂取天德武州等八館之地因攻鎮威城
兵馬監押朱昭力戰敗死既而金得谷神以數萬
騎陽出為獵掩至天德逼逐夏人
悉奪有其地夏人請和金執其使

己未高宗皇帝紹興九年金熙宗重天眷二年夏五月夏主乾

順卒子仁孝立乾順殂年五十七仁孝年十六即位改元大慶

庚寅孝宗皇帝乾道六年金世宗雍大定十年夏五月夏相任

得敬為其主仁孝中分其國請命於金金主不許

初仁孝之嗣位也國內多亂任得敬抗禦有功遂相夏國二十餘年陰蓄異志誣殺宗親大臣其勢漸逼仁孝不能制是歲乃分西南路及靈州羅龐嶺地與得敬自為國且上表於金為得敬求封金

主以問宰相欲許之金主曰有國之主豈有無故分國與人此必權臣偏奪非其本意况夏國稱藩歲久朕為四海主寧容偏於賊臣若彼不能正則當以兵誅之乃賜仁孝詔曰先業所傳亦當固守今茲請命事頗靡常未知措意之由秋八月夏任來績當遣使以詢爾得敬始有懼心得敬伏誅

癸丑光宗皇帝紹熙四年

金章宗璟明昌四年

冬十二月夏主

仁孝卒子純祐立

仁孝建學於國中立小學於禁中親為訓導孔子為文宣帝

然權臣擅國兵政衰弱殞年七十子純祐年十七立改元天慶

丙寅寧宗皇帝開禧二年

金泰和六年

秋七月夏季安全

廢其主純祐而自立

安全乾順孫越王仁友子也封鎮夷郡王至是廢純祐而

自立改元應天純祐亦尋卒時年三十

己巳嘉定二年

金主承濟大安元年

夏五月蒙古入靈州夏主

安全降

元太祖自將

庚午三年

金大安二年

秋八月夏侵金陵州

夏自宣和間與金議和八

十餘年未嘗交兵至是為蒙古所攻求救於金金主承濟新立不能出師夏人怨之遂侵陵州金慶

山奴擊敗之而去

辛未四年

金大安三年

秋八月夏主安全卒族子遵道立

安金殂年四十二有子曰承禎未立齊國忠武王彥宗之子遵頊立遵頊始以宗室策試進士及第為大都督府主至是立年四十九改元光定

甲戌七年金宣宗珣貞佑二年夏五月夏人請會師伐金不報

夏人以書來四川議夾攻金以恢復故疆特董居誼初入蜀不之報由是虜訊中絕

丁丑十年金興定元年冬十二月蒙古圍夏興州夏主遵

頊出西涼

己卯十二年金興定二年春正月夏人請會師伐金詔許

之

庚辰十三年

金興定四年

秋八月夏取金會州金遣使如

夏議和

九月夏人圍金鞏州官軍會之不克而

還

夏甯子寧率衆二十萬圍鞏州且來趣兵王仕信帥師發宕昌四川宣撫司統制質俊帥師發

下城安丙命沔州都統張威利都統程信與元都統制田冒金州都統陳昱分道進兵威與諸將連

疑不進質等克來遠鎮敗金人于定邊城王仕信克鹽川鎮程信引兵會夏人于鞏州攻城不克遂

趨秦州夏人自安遠信退師信復邀夏人共攻秦州不從遂自伏羌城引兵還諸將皆罷去

辛巳十四年

金興定五年

冬十月蒙古朮華黎侵夏夏人

以兵附之

朮華黎由東勝州涉河引兵而西夏主聞之懼遣塔海鹽府等宴朮華黎於河

南且遣塔哥甘普將兵五萬屬馬木華黎既取葭州綏德夏主遣迷僕帥衆會之迷僕問木華黎相見之儀木華黎曰汝主見我主帥其禮也迷僕曰未受主命不敢卽拜因引衆去木華黎進攻延安迷僕始費馬拜

癸未十六年

金元光二年

冬十二月蒙古攻夏夏主遵頊

傳國於其子德旺

遵頊自號上皇未幾卒年六十四德旺年四十二立改元乾定

甲申十七年

金哀宗中緒正大元年

冬十月夏及金平

夏人與金通好

八十年嘉定六年以小故生釁構難十年一勝負遂至精銳俱盡兩國皆弊至是夏遣其吏部尚書李仲諤修好於金稱弟而不臣各用本國年號金遣禮部尚書奧敦良弼報之

乙酉理宗皇帝寶慶元年金正大二年冬十月蒙古鐵木

真伐夏取甘肅州西涼府十一月取靈州進次鹽

州川以西夏納仇人亦騰喝翔昆及不入質子也

丙戌二年金正大三年秋七月夏主德旺以憂卒第子睨

立蒙古主入夏城邑多降德旺憂悸而卒年四十六國人立清平郡王之子南平王睨

丁亥三年金正大四年夏六月蒙古鐵木真滅夏以夏主

睨歸蒙古盡克夏城邑其民穿鑿土石以避鋒鏑免者百無一二白骨蔽野蒙古主避暑於六

盤山喻月夏主睨力屈出降遂繫以歸夏亡時諸將爭掠子女財帛耶律楚材獨取書數部大黃所

駝而已既而軍士病疫唯獨
大黃可愈楚材之所活萬人

遺事雜誌

唐 授田牟靈州節度使制

門下奏築城以備虜未若選將爲長城漢設策以
禦戎未知得人爲上策况朔野之北全涼以東兵
臨五城地遠千里非疇勞無以分爵土非用武何
以示恩威副吾勤求允屬雄傑檢校金部尚書金
吾衛大將軍田牟才度間生智能兼從家承弓冶

業擅緇鈴而又揭厲儒流詳閑吏術不戰而烽煙
自息言兵而勝負已知洎早服官榮常參羽衛流
五原之懿績播三鎮之威聲風猷藹然令望斯著
如一作爾兄弟之孝友化自閨門祖父之忠貞書

于竹帛是用擢在環列爲予警巡覲其形容益見
誠意朕以党羌未滅邊障是憂籍汝通明與我安
撫所宜勵清廉於虜倍宣惠澤於戎人恢紀律貴
乎齊刑理蠻夷惡其生事藩垣北地控帶長河仍

加毛玠之榮不改趙堯之秩可檢校吏部尚書靈
州節度使

授鄭齊之靈武副使制

朕以靈武重鎮控制西戎故選於和門付以油節
思得幹用以佐叅畫如聞齊之自得科名留心政
術奉沙漠之使佐榷莞之司口不告勞入稱奉職
其與思謙臨洎知退皆鑘研文學承襲軒裳暢彼
聲光端其操履是可以佐罇俎於台席奉指教於

才臣而八達九衢曉巡夜警亦執金吾之重務也
咸允章奏無忝所從可

西夏請售青白鹽鹽出烏白池夏人擅以爲利自
李繼遷叛乃禁毋入塞未幾罷慶曆中元昊納款
請歲入十萬石售於縣官諫官孫甫等言車運疲
勞又並邊戶嘗言青鹽價賤而味甘故食解鹽者
少雖刑不能禁今若許之則並邊蕃漢盡食夏人
所販青鹽不能禁止則解鹽利稍陝西財用屈矣

乃不許其請

西夏曩霄之叛其謀皆出於華州士人張元與吳
昊而其事本末國史不書比得田書承君集實紀
其事云張元吳昊姚嗣宗皆關中人負氣倜儻有
縱橫才相與友善嘗薄遊塞上觀視山川風俗有
經畧西鄙意姚題詩崆峒山寺壁在兩界間云南
粵干戈未息肩五原金鼓又轟天崆峒山叟笑無
語飽聽松聲春晷公巡邊見之大驚又有踏破

賀蘭石掃清西海塵之句張爲鸚鵡詩卒章曰好
著金籠收拾取莫教飛去別人家吳亦有詩將謁
韓范二帥耻自屈不肯往乃畫大石刻詩其上使
壯夫拽之於通衢三人從而哭之欲以鼓動二帥
旣而果召與相見躊躇未用間張吳徑走西夏公
以急騎追之不及乃表姚入幕府張吳旣至夏國
夏人倚爲謀主以抗朝廷連兵十餘年西方至爲
疲弊職此二人爲之時二人家屬羈縻隨州間使

謀者矯中國詔釋之人未有知者後乃聞西人臨
境作樂迎此二家而去自此邊帥始待士矣姚又
有述懷詩曰大開雙白眼只見一青天張有雪詩
曰五丁仗劍決雲霓直取銀河下帝畿戰死王龍
三十萬敗鱗風捲滿天飛吳詩獨不傳觀此數聯

可想見其人非池中物也

容齋
三筆

景祐末有二狂生曰張曰吳皆華州人薄遊塞上
覘覽山川風俗慨然有志於經畧耻於自售故意

詩酒語皆絕豪嶮驚人而邊帥拳要皆莫之知俚
無所適聞夏酋有意窺中國遂叛而往二人自念
不力出奇無以動其聽乃自更其名即其都門之
酒家劇飲終日引筆書壁曰張元昊昊來飲此樓
邏者見之知非其國人也迹其所憇執之夏酋詰
以入國問諱之義一人大言曰姓尚不理會乃理
會名耶時襄霄未更名且用中國賜姓也於是竦
然異之曰尊寵用事實元西事蓋如此其爲人概

可想見洪文敏謂二人名偶與首同寔不詳其所
以更名之意云程史

元昊幼時嘗往來牙市中曾瑋欲一識之屢使人
誘致之不可得乃使善畫者圖形容既至觀之曰

真英物也此子必須為邊患錢溪筆談

始元昊寇邊王師屢撓虜之氣焰益張常有並吞
關中之意其將剛浪凌號野利王其號天都王各
統精兵於別部元昊倚以為腹心凡所以能勝我

軍皆二將之策也。种將軍世衡方城青澗謀有以去之。有王嵩者本青澗僧。世衡察其堅朴。誘令冠帶。因出師。以賊級予之。白於帥府。表授三班借職。充經畧司指揮。且力爲辦其家事。凡居室騎從衣食之具。悉出世衡。嵩感恩旣深。世衡反不禮。以奴畜之。或掠治械繫數日。嵩雖不勝其苦。卒無一辭。然望世衡知可任。以事居半年。召嵩謂之曰。吾將以事使汝。吾戒汝所不言其苦。雖有甚於此者。汝

能爲吾卒不言否嵩泣對曰嵩貧賤無狀蒙將軍
恩教致身榮顯常誓以死報而未知其所况敢辭
樵楚乎世衡乃草遣野利書書辭大抵如世間問
起居之儀惟以數句隱辭如嘗有私約而勸其速
行之意書於尺素且膏以蠟置衲衣間密縫之告
嵩此非濱死不得泄如泄之當以負恩不能成吾
事爲言并以畫電一幅棗一部爲信俾遺野利嵩
受教至野利所居致將軍命出棗電投之野利知

見侮笑曰吾素竒种將軍今何兒女子見識度嵩
別有書索之嵩目左右旣而答以無有野利不敢
匿乃封其信上元昊數日元昊召野利與嵩俱西
北行數百里至一大城曰興州先詣一官寺曰樞
密院次日中書有數胡人雜坐野利與焉召嵩廷
詰將軍書問所在嵩堅執前對稍稍去巾櫛加執
縛至於樺楚極苦嵩終不易其言又數日召入一
官寺廳事廣楹皆垂班竹箔綠衣小豎立其左右

嵩意元吳宮室少頃箔中有人出又以前問責之
曰若不速言死矣嵩對如前乃命曳出誅之嵩大
號且言曰始將軍遣嵩家遺野利上書戒不得妄
泄今不幸空死不了將軍事吾有將軍箔中急使
人追問之嵩具以對乃褫衲衣取書以進書入移
刻始命嵩就館優待以禮元吳於是疑野利陰遣
愛將假為野利使使于世衡世衡知元吳所遣未
即見命屬官日館勞之問虜中山川地形在興州

左右言則詳迫野利所部多不能悉適擒生虜數人因令際中視之生虜能言其姓名果元昊使世衡意決乃見之世衡燕服據案坐屬官皆朝衣抱文籍鳧鴈侍左右於是宿贊引使者出拜使者傳野利語世衡慢罵元昊而稱野利有心內附乃厚遣使者曰爲吾語若王速決無還留也度使者至嵩卽還而野利已報死矣世衡知謀已行因欲拜間天都又爲置祭境上作文書於版以弔多述野

利與天都相結有意本朝悼其垂成而失其文雜
紙幣何有虜至急焚之以歸版字不可遽滅虜人
得之以獻元昊天都以此亦得罪元昊既失二將
久之始悟為世衡所賣遂定講和之策焉自警編

又元昊之臣野利常為謀主守天都山號天都大
王與元昊乳母白姥有隙歲除日野利引兵巡邊
深涉漢境數宿白姥乘間乃譖其欲叛元昊疑之
世衡嘗得養曾之子蘇吃曩厚遇之聞元昊嘗賜

野利寶刀而吃曩之幸于野利世衡因使吃曩竊
野利刀許之以緣邊戰任錦袍真金帶吃曩得刀
以還世衡乃唱言野利已爲白姥譖死設祭境上
爲祭文序歲除日相見之歡入夜乃火燒紙錢川
中盡明虜見火光引騎近邊窺覘乃佯委祭具而
銀器九千餘兩悉棄之虜人爭取器血得元昊所
賜刀及火爐中見祭文已燒盡但存數十字元昊
得之又識其所賜刀遂賜利死野利有大功死不

以罪自此君臣猜貳夢溪筆談

康定間元昊寇邊韓魏公領西路招討駐延安忽
夜有人携七首至卧内遽褰帟帳魏公坐問誰何
曰某來殺諫議又問曰誰遣汝來曰張相公遣某
來蓋是時張元夏國正用事也魏公復就枕曰汝
携予首去其人曰某不忍願得諫議金帶足矣遂
取帶而出明日魏公亦不治此事俄有守陴卒報
城櫓上得金帶者乃納之時范純佑亦在延安謂

公曰不治此事爲得體蓋行之則沮國威今乃受其帶是墮賊計中矣魏公握其手再三嘆服曰非

琦所及

自警
編

景祐中党項首領趙德明卒其子元昊嗣立朝廷遣卽官楊吉入蕃弔祭吉至其國中元昊遷延延立屢促之然後至前受詔及拜起領詔其左右曰先王大錯有國如此而乃臣屬於人旣而饗吉於廳其東屋後若千百人鍛聲吉陰知其有異志還

朝秘不敢言未幾元昊果叛其徒遇乞先創造蕃
書獨居一樓上累年方成至是獻之元昊乃改元
制衣冠禮樂下令國中悉用蕃書胡禮自稱大夏
先是元昊後房生一子曰窳令受窳令者華言大
王也其後又納沒臧訛麗之妹生諒祚而愛之窳
令受之母恙忌欲除沒臧氏授戈於窳令受使圖
之窳令受間入元昊之室卒與元昊遇遂刺之不
殊而走諸大佐沒臧訛麗輩仆窳令梟之明日元

吳死立諒祚而舅訛龐相之有梁氏者其先國中
人爲訛龐子婦諒祚私焉日視事於國夜則從諸
沒臧氏訛龐懟其謀伏甲梁氏之宮須其入以殺
之梁氏私以告諒祚乃使召訛龐執於內室沒臧
強宗也子弟族人在外者八十餘人悉誅之夷其
宗以梁氏爲妻又命其弟乞埋爲冢嗣許其世襲
諒祚凶忍好爲亂治平中遂舉兵犯慶州大順城
諒祚乘駱馬張黃屋自出督戰守陴者彊弩射之

中乃解圍去創甚馳入一佛祠有牧牛兒不得出
懼伏佛座下見其脫靴血踈于踝使人裝創昇載
而去至其國死子秉常立而梁氏自主國事梁乞
埋死其子移逋繼之謂之沒寧令者秉常之世執
國政者有嵬名浪遇元昊之弟也最老於軍事以
不附諸梁遷下治而死存者三人移逋以世襲居
長契次日都羅馬尾又次日關明訛畧知書私侍
梁氏移逋前訛皆以昵倖進唯馬尾但有戰功然

皆庸才秉常荒淫染氏自主兵不以屬其子秉常

不得志以李清事被廢

夢溪筆談

元豐中夏戎之母梁氏遣將引兵卒至保安軍順

寧寨圍之數重時寨兵至少人心危懼有娼老李

氏得梁氏陰事甚詳乃掀衣登陴抗聲罵之盡發

其私虜人皆掩耳併力射之莫能中李氏言愈醜

虜人度李終不可得恐且得罪遂託以他事夜解

去鷄鳴狗盜皆有所用信有之

夢溪筆談

汝礪論曰自赫連氏滅族而靈夏出沒於兩魏
周隋之間殆二百年矣拓跋赤辭以微虜得通
籍于唐寅緣有土沙漠之李寔基於此思恭舉
義赴難顯受麾節其子孫入五代遂王朔方尋
殷歸欵世受封卹繼捧入朝賜姓天水以百千
氈裘馬駱之族立中華朝請班列之端顧亦榮
矣繼遷梟鷲耻戎帳之散沒起而載收之德明
屬服諸羌遂啓興州之業元昊始僭大號據土

二萬餘里而鄜延環慶涇原秦鳳之民苦於躪
踐自結髮用兵未有挫衄雖遇以韓范諸賢僅
能周旋其間而亦無竒大之績爲可憾也其不
死於宋敵而戕於戶庭者蓋其法制嚴於酬應
固足以衛身然上天悔禍禱奪其魄而縱其內
亂故假手於子以報其慘暴之罪發其穢濁之
行固其所也諒祚智能禦宋而不能保其母秉
常奪於母氏而被幽乾順建學養士似有華風

其倨見宋使又何無狀之甚也仁孝崇儒尚儉
豐財用修律令固一時之賢也然權臣竊命兵
政衰弱優悠七十之年卒無振厲之績仁厚有
餘而剛斷不足此宋之幸拓跋氏之不幸也純
祐繼統尋就廢置及蒙古兵起安全請降遵頊
出奔德旺憂死而睨被繫執夫以二十二都之
富疆乃一旦鞠為瓦灰蔽為白骨蓋其始也以
忠順而著其中也以權術而興其終也以仁懦

而敵嗚呼然亦可謂歷世之久者矣

今天下爲府一百五十有奇爲州二百二十有奇爲縣一千二百有奇爲衛所不減於縣間有地志者奚啻百種未嘗覩考古若是之詳也豈吾竹山哀多逞富之好異耶蓋自戰國分天下爲七至秦并其六而一之置郡邑四十然震夏之地猶未盡有漢雖取河南地置朔方郡然河西尤爲夷狄所據及僞夏專有之則乃大抗中

國歷唐歷宋或取其地或役其兵似不失華夏
之尊而其勤師納幣守禦之嚴何有於斯須之
暇哉元以胡人入主中國雖拓地過於前代而
東南島夷尚未盡附其華夷一統玉帛萬國自
唐虞以來嘗有如我

皇明之盛者耶盛久易忽保其盛而使億載一時其
勢何居誠在乎謹邊圉爾寧夏之爲邊襟喉秦
雍扼塞京師顧豈輕於斷匈奴之臂者視延綏

負山澗之險阻又且不侔苟或任匪其人使民
業不安兵力不振一旦失守其能弭中原之禍
哉閱茲已往之跡用注將來之思庶幾保厥盛
而不墮則億載可一時矣此吾竹山之隱意孰
謂其好異也歟